

**SEVENTH LEGISLATIVE ASSEMBLY OF MIZORAM  
(EIGHTH SESSION)**

**LIST OF BUSINESS**

FOR TWELFTH SITTING ON THURSDAY, THE 31<sup>st</sup> MARCH, 2016  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **Pu LALSAWTA**, Minister to lay on the Table of the House the following :
  - i) Statement on Six Monthly Review of the Finance Minister on the Fiscal Position of the Government of Mizoram for the Second half of 2013-2014 (October, 2013-March,2014).
  - ii) Statement on Six Monthly Review of the Finance Minister on the Fiscal Position of the Government of Mizoram for the First half of 2014-2015 (April, 2014-September,2014).

**PRESENTATION OF REPORTS**

3. **Pu T. SANGKUNGA**, to present to the House the following Reports of Subject Committee-II :
  - i) Third Report of Subject Committee-II relating to Border Area Development Programme under Rural Development Department.
  - ii) Fourth Report of Subject Committee-II on Action taken by the Government on the recommendations contained in the First Report of Subject Committee-II of the Seventh Legislative Assembly relating to Mizoram State Pollution Control Board under Environment & Forests Department.

- iii) Fifth Report of Subject Committee-II relating to Mizoram Houses (New Delhi, Kolkata and Guwahati) under General Administration Department.

**LEGISLATIVE BUSINESS**

***Bill for introduction, consideration and passing***

4. **Pu R. ROMAWIA**, Minister to beg leave of the House to introduce “The Mizoram (Land Acquisition, Rehabilitation and Resettlement) Bill, 2016”.

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

5. **Pu R. ROMAWIA**, Minister to beg leave of the House to introduce “The Indian Stamp (Mizoram Amendment) Bill, 2016”.

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

6. **Pu LALSAWTA**, Minister to beg leave of the House to introduce “The Mizoram Lokayukta (Amendment) Bill, 2016”.

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

NGURTHANZUALA  
Secretary

.....

**SPEAKER :** A tawp berah chuan unaute u, lawm takin awm rawh u. Tihthat famkimin awm ula; thlamuang takin awm ula; rilru hmun khat pu ula, lungruah takin awm rawh u; tichuan, hmangaihna leh remna Pathian chu in hnenah a awm dawn zuk nia. (2 Korinth 13 : 11).

Zawhna kan la ang a, No. 166-na zawt turin member zahawm tak Dr. K. Beichhua ilo sawm ang.

**Dr. K. BEICHHUA :** Pu Speaker, ka lawm e. Power & Electricity Department changtu kan Minister zahawm tak hnena ka zawhna chu - Mizoram sorkar leh NTPC Ltd. in Kolodyne-II, HEP khuap tura MoU an sign tawh kha tun dinhmunah eng chen nge hma lak ni tawh ?

**SPEAKER :** Awle, a department neitu House Leader zahawm tak Pu Lal Thanhawla chhang turin ilo sawm ang.

**Pu LAL THANHAWLA, CHIEF MINISTER :** Pu Speaker, Starred Question No. 166-na member zahawm tak Dr. K. Beichhua zawhna chhanna chu - Techno economic clearance neih a ni tawh a. Forest clearance buaipui leh mek a ni a. Forest clearance chungchangah hian MoEF chuan NTPC Ltd. chu Forest clearance an dilna ngun lehzuala zir chiang turin a ti a, MIRSAC chu GPS chungchanga thil pawimawhte ti tura ngen ni se tih a ni bawk. Mahse tunhnaiah NTPC Ltd. chuan forest clearance chungchangah hmalakna thar a nei rih lo a ni.

NTPC Ltd. chuan kum 26 chhung tui tam dan an zir chiannaah e-flow (envirionmental flow) vangin power siam chhuah tura beisei zat 1800MU chu 1100MU-ah a tlahniam tih an hmuchhuak a. Hemi vang hian power siam chhuah man pawh ₹ 11/- per unit-ah a kai chhoh phah a. Sorkar thutlukna hnukung berah chuan NTCP Ltd. in power leitu tur a zawng ang a, Power Purchase

Agreement (PPA) siampui tur a hmuh loh chuan he project hi Mizoram sorkar hnenah a hlan let leh ang tih a ni.

Tin, nimina ka sawi thawi thuak tawh ang khan NTCP-ah hian 2008/2009 vel laia pek tawh kha a ni a, mahse DPR te kan hun hmasa lama mi kha a ni a, cost over run, time over run tih avangin ennawn a ngai a, chu chuan hun a duh a. Tin, clearance neuh neuh a lo ngai leh a, nimina ka sawi ang khan techno economic clearance te a lo ngai a, chu chu tunah an nei tawh a. Ka sawi tawh ang khan Forest & Environment clearance an buaipui mek a ni.

**SPEAKER** : Zawhbelhna a awmlo maw ? Anih chuan zawhna dang.....

**Pu LAL THANHAWLA, CHIEF MINISTER** : Pu Speaker, member zahawm takte hriat atan a pawimawhin ka hria, a bik takin a zawttu chhim lam area atangin a nih avangin Kolodyne II Hydro Electric Project 460 mega watt pechhuak thei tur Lawngtlai leh Saiha inkar Kawlchaw kai chhak lama Kolodyne khuah tur hi 22 December, 2008 khan Mizoram sorkar leh NTPC te chuan agreement a nei a.

Tin, NTPC te hian Kolodyne II hi build own operate and maintain group in an thawk ang a, clearance hmuh atanga thla 18(sawm pariat) chung ngeiin project hna hi tan tura tih an ni. Tin, memorandum of agreement hi Secretary, Power & Electricity Department atanga hmalak a ni a, ram tana thil thaah chuan District Council-te nena inrawn tlanga hma lak ho zel a ni a. Tin, wawi duailo kan inrawn tlang tawh a tunhma atang khan. LADC leh MADC hotute nen Kolodyne stage-II chungchangah ni 1.12.2010 khan Chief Secretary Conference Room-ah meeting pawimawh tak neih a ni. Chutah chuan MoA clause 29 leh 31 siamthat tul pawh ngaihtuah a ni a, chubakah free power, project



affected families leh project headquarter, Lawngtlai atanga Kawlchaw-a sawn te pawh ngaihtuah a ni bawk.

Tin, ni 12.4.2012-ah Mizoram House, Vasant Vihar New Delhi-ah Mizoram Chief Secretary te leh NTPC hotuten Kolodyne Hydro Electric Project chungchangah hian meeting pawimawh tak an nei leh a. Ni 1.8.2014 ah Secretary, Power & Electricity Department Office chamber-ah Progress Implementation on Hydro Electric Project under taken by PSU private developers review meeting neih a ni a. He review meeting-ah hian NTPC chu submergence area demarcation hna tan thuai turin tih a ni a. He project hlawhtlin theih nan hian review meeting ni 24.2.2015, 6.5.2015 leh 1.12.2015-ah te neih leh a ni. Project siam nan lung tha pawh dap mek a ni a, kokim zawka review meeting pawh neih leh thuai tum a ni. Hetah hian District Council pahnih te bakah Environment & Forests Department leh Land Revenue & Settlement Department te pawh tel tura tih an ni a.

He project tihlawhtlin a nih hnuah chuan, a hlawkpui leh a hmanh tangkai ber turte chu a bul hnaia chengte an ni dawn a. An hlawkpui theihna tur hrang hrang ruahmante chu, 13% free power atangin 1% hi local area development fund atan ruahman a ni. Electric unit 100 zela project affected families chhungtin hnenah thla tin kum 10(sawm) chhung a free in pek an ni ang. District Council te hnenah rate dinglai angin balu, rora leh thil dang royalty lak theihna ang chi zawng zawng NTPC te hian an pe ang a, hei hian District Council te revenue nasa takin a tipung ang tih kan beisei a.

Tin, corporation te hian Post Office, School leh Dispensary te project side-ah an siam ang. Tin, hei bak hi Corporate Social Responsibility Fund atangin a tul ang ang te pawh tualchhung mite nen ngaihtuah ho tura tih an ni. Project hnathawk workmen lak chungchangah pawh 100% recruitment chu an ram kan

laksakte atangin lak a ni ang a, hengte atanga a daihlo chu Mizoram chhung hmun hrang hrang atanga lak an ni ang.

He project zawh a nih hunah Lai Autonomous District Council leh Mara Autonomous District Council ten a Reservoir hi Fishery emaw Tourism emaw, Inland water ways atan emaw an hmang thei ang. Heng kan tarlante bakah pawh kawng hrang hrangin District Council-te tan hlawkna awm thei tur tam tak a awm kan beisei.

Compensation chungchangah, Lai Autonomous District Council, Mara Autonomous District Council, NTPC leh Mizoram State sorkar ten ruahmanna felfai tak siamin assessment neih a ni ang.

Techno-economic clearance hi hmuh tawh a ni a. Forest clearance dilna hi May Ni 10, 2014 khan ministry-ah sorkarin a theh lut tawh a. Forest clearance neihna tura Ministry of Environment and Forest ten an thil phut DGPS map hi tunah hian NTPC hian a buaipui a. Forest clearance pawh hmuh thuai beisei a ni a. Chumi atang chuan keimahni hian sorkar lam atang pawhin theihpatawpin nawr mek a ni, Pu Speaker.

**SPEAKER :** Awle, tunah chuan zawhna No.168-naah kan kal thei ta a, a zawhna neitu Pu Vanlalzawma, MLA zahawm tak sawm ila. Zawhna No.167 neitu Pu Chalrosanga hi a awm lova, zawt turin tumah authority a pe lova, pek a nei em? Kan tihsual kha kan tidik ta zawk a nih chu. Tunah chuan zawhna No.168-na, a neitu Pu Vanlalzawma, MLA zahawm tak sawm ila.

**Pu VANLALZAWMA :** Pu Speaker, ka lawm e.

Ka zawhna No.168-na Power & Electricity department changtu Chief Minister zahawm tak chhan atan: -

- (a) Aizawl khawpui chhung street light dahna hmun tur hi tunge thlang thin?
- (b) 2013-2014 leh 2014-2015 chhunga street light chhit man engzatnge Power & Electricity department hian AMC atangin a dawn?
- (c) Electric bana lawn tur bik department-in a nei em?

**SPEAKER :** Awle, a chhang turin Leader of the House zahawm tak Pu Lal Thanhawla i sawm ang.

**Pu LAL THANHAWLA, CHIEF MINISTER :** Pu Speaker, member zahawm tak Pu Vanlalzawma Starred Question No.168-na chhanna te -

- (a) Aizawl khawpui chhunga street light dahna hmun tur hi AMC te thlan leh ruahman a ni.
- (b) Street light chhit man AMC atanga dawn dan hetiang hi a ni –
  - i) 2013-2014 - ₹170,11,930.00
  - ii) 2014-2015 - ₹165,63,698.00
- (c) Electric bana lawn tur bik department-in a bithliah lova, a fimkhur thei ang ber erawh chuan an kalpui thin.

**SPEAKER :** Zawhbelhna a awm a, zawhna neitu Pu Vanlalzawma.

**Pu VANLALZAWMA :** Pu Speaker, ka zawhbelhna chu, khang street light dahna tur kha AMC ten Local Council te an thlantir niawm tak niin ka hria a. Ka'n zawh duh lai tak chu, tunhma kha chuan electric banah khan dah a ni thin a. Chumi piah lamah chuan ban atanga kawng, step lo peng ti ang vel te metre 20/30 angah te pawhkawi theih a ni em tih leh, electric bana lawn tur bik kan nei lo a nih chuan Local Council te khan tlangval fel deuh te an lo lawn tirin khang an street light te kha an lo connect ve mai thei em ni, tih kha ka zawhbelhna a ni, Pu Speaker.

**SPEAKER :** Awle, Chief Minister zahawm tak chhang turin ilo sawm ang.

**Pu LAL THANHAWLA, CHIEF MINISTER** : Pu Speaker, electric bana lawn tur hi bithliah an awm lo ka ti tawh a. Lawn a tul erawh chuan hnathawh dan tur azirin shut down a ngai thin a, intihpalh a awm lohna turin. Tin, lifeline-a hnathawk tur hian safety measure hrang hrang hmang tura tih an ni a. A theih chin chinah zawm hram hram a ni thin.

Tin, AMC te hian, ni e, Local Council te nena inrawn a che tlang tur an ni a, an inrawn tlang pawh niin a lang a. Tin, authorized, official authorization, special permit awmlo chuan electric pawh vel leh ilo hi dan kalh a ni a, a hlauhawm em avangin. Kan sawi tawh angin Mizoram-ah hian kan inthlahdah angreng hle a, tawng mawi lo ni suh se. Tin, transmission leh distribution loss pawh hi a sanna ber state te zing ami kan ni thin a, kan la ni reng a. Heng hi power theft a tam a. Tin, mahni duh thu thu a lo pawh ve mai ching hi an tam a. A theih chin chinah chuan strict takin ven chu an veng ve reng a. Mahse, ven sen loh hi kan nei a. Tin, pawt peng mai duh, ru mai duh ang te hi mi engemaw pawimawh tak tak, society-ah pawh nihna dinhmun neite thleng hian an lo ti ve mai zel bawk a, hei hi thil vanduaithlak tak a ni.

Tin, department phalna lo chuan in te pawh hi, tawng mawi lo ni suh se, in naran lutuk leh chhe lutuk, short circuit atan pawha hlauhawm zual bikah te pheh chuan department phalna lo chuan pawt lo tur a beisei an ni a. Mahse, chuti chung chungin authorization awm lo, permit awm loa pawh mai mai hi a tam khawp mai.

**SPEAKER** : Awle, zawhna No.169-naah kan kal thei ta a, a zawhna neitu MLA zahawm tak Pu Ngurdingliana i sawm ang.

**Dr. NGURDINGLIANA** : Pu Speaker, ka lawm e. Ka Starred Question No.169-na Agriculture Department Minister zahawm tak chhan atan – Phullen AEO circle, SDAO post a upgrade tura ruahmanna kha tun dinhmunah enge a thlen tawh tih ka zawt e.

**SPEAKER** : Aw, a chhang turin a changtu minister zahawm tak Pu R. Lalzirliana i sawm ang.

**Pu R. LALZIRLIANA, MINISTER** : Pu Speaker, MLA zahawm tak Dr. Ngurdingliana zawhna chhanna chu - field staff hi department-ah a indaih lo em em a. Tuna SDAO office kan neih sa te pawh hi SDAO te indaih loh avangin SDAO in an thutchilh kim thei lova. A nih dan tur ang pawhin kan function hleithei lova, chubakah post thar siam hi sorkarin a remtih rih loh avangin hma a lak theih rih loh a ni.

**SPEAKER** : Aw, zawhbelhna a awm lo. No.170-naah kan kal thei ta a, a zawhna neitu MLA zahawm tak Pu Lalthanliana'n lo zawt se.

**Pu LALTHANLIANA** : Pu Speaker, ka lawm e. Power & Electricity Department changtu Chief Minister zahawm tak khawngaih taka min chhan sak turin, Starred Question No.170-na, Serlui Hydel Project-ah hian tun dinhmunah megawatt engzatnge thar chhuah a nih, tih ka zawt e.

**SPEAKER** : Awle, a chhang turin Leader of the House zahawm tak Pu Lal Thanhawla sawm ila.

**Pu LAL THANHAWLA, CHIEF MINISTER** : Pu Speaker, member zahawm tak Pu Lalthanliana Starred Question No.170-na chhanna chu – Serlui 'B' hydel project-ah hian tun dinhmunah 8 mega watts tharchhuah mek a ni.

**SPEAKER** : Aw, Pu Rinawma, zawhbelhna.

**Er. LALRINAWMA** : Pu Speaker, ka lawm e. Unit engzat nge bun a nih tih leh tunah unit engzat nge chhawr a nih tih kha ni ta se. A dawt leh atan chuan catchment area te kha enkawl that a ni em tih a ni e.

**SPEAKER** : Awle, zawhbelhna chhang turin Chief Minister Pu Lal Thanhawla sawm ang.

**Pu LAL THANHAWLA, CHIEF MINISTER** : Pu Speaker, Serlui 'B' hydel project hi, khawl 3/4 mega watts zel pechhuak thei tur bun a ni a, unit 1 chu 21<sup>st</sup> May, 2010-ah bun a ni a, unit II chu 30<sup>th</sup> April, 2010, unit III na chu 6<sup>th</sup> October, 2015 atanga January, 2016 thleng hian Serlui 'B' Hydel Project hian kawlpheha 141.8945 MW a pechhuak tawh a, tun dinhmunah chuan Unit I & II chauh hi hman theih a ni a, Unit III hi khawl lamah harsatna a awm a, siam turin an inbuatsaih mek a ni.

A siamna tur khawlte pawh tihhlen a ni tawh a, tlema zawng thleng kim lo a awm a, hei hi contractor an lo kal a an vuah chuan a vai hian hman theih tura beisei a ni.

Tin, khawl pathum unit I, II, III te hi an vaia tlan tir thuai tura beisei an ni. Tunlai hian tlai dar 4 atanga dar 11 leh zing lam dar 6 atanga dar 10 inkarah chuan khawlte hi tihnun an ni. Power indaih loh chang erawh chuan a tul anga hman thin a ni.

Tin, Serlui 'B' a total generation hi 10<sup>th</sup> May-January, 2011 thleng 141.8945 MW nichina ka sawi tawh kha a ni a, a rate ang chuan cheng 50.59 crores man hu ang vel a ni ang.

**ER. LALRINAWMA** : Pu Speaker, ka zawhbelhna catchment area kha eng anga enkawl zel nge tih kha min la chhang miah lova.

**Pu LAL THANHAWLA, CHIEF MINISTER** : Pu Speaker, catchment area khu tihfelna a rei tawh a, tunah chuan khuahkhirh a ni a. Kan hriat angin a dil

khu sangha lam tan te hman tangkai a ni a. Tunah chuan Tourism atan promote tum a ni a, Toursim-in theihtawp an chhuah mek a ni.

Hemi House Board dan chuan DPR te pawh siam a ni a, a tangkai thei ang berin Tourism-in tourist spot atan hman tum a ni. Tuna a nihna ang ang pawh khuan Silchar lam atang leh hmun dang dang atangin tlawhtu an awm reng a ni. A tlangpuin catchment area hi chu P&E ta a ni tawh lova, mahse tunah khuan a nih tur ang taka hman a ni a, ama'rawhchu, encroachment te a lo awm leh zauh thin a, sorkar ang pawhin a buaithlak hle a, chutiang vel te pawh chu theihpatawpa enkawl a ni a. Kolasib District atangin District administration ten mawhphurhna neiin a tul angin venhim hna te pawh an thawk mek a ni.

**SPEAKER :** Awle, zawhna no.171-na neitu Pu Lalruatkima sawm ila.

**Pu LALRUATKIMA :** Pu Speaker, ka lawm e. Ka starred question No.171-na, School Education Department Minister chhan atan :-

- a) Kum 2011-2016 chhungin free text book atan sum engzat nge hmuh a nih ?  
A year wise-in engzat nge ? Heng kumah te hian free text book atan hian engzat nge sen a nih ?
- b) Free text book te hi District hrang hranga semchhuah nan State Project Office hian engzat nge a hman ral ?

**Pu H. ROHLUNA, MINISTER :** Pu Speaker, Pu Lalruatkima Starred question 171-na chhanna chu –

- a) Kum 2011-2016 chhungin free text book atan sum ₹ 14,35,61,800/- hmuh a ni a. A hnuaiyah hian sum hmuh leh hman zat tarlan a ni :-

<b>Year</b>	<b>Receives ₹</b>	<b>Expenditure ₹</b>
2011-12	3,20,45,450/-	3,20,45,450/-
2012-13	3,19,72,500/-	3,19,72,500/-

2013-14	3,29,12,450/-	3,29,11,3240/-
2014-15	2,46,33,200/-	2,46,33,200/-
2015-16	2,19,98,200/-	In progress
<b>TOTAL</b>	<b>14,35,61,800/-</b>	<b>12,15,62,490/-</b>

b) Free text book-te hi District hrang hranga semchhuah nan State Project Office hian kum 2011-2016 chhungin ₹ 50,20,326/- a hmang ral a, hetiangin –

<b>Year</b>	<b>Free text book head</b>	<b>Management</b>	<b>Total</b>
2011-12	0	47,916/-	47,916/-
2012-13	15,90,001/-	2,57,409/-	18,47,410/-
2013-14	0	16,75,000/-	16,75,000/-
2014-15	8,16,183/-	6,33,817/-	14,50,000/-
2015-16	In progress	In progress	In progress
<b>Total</b>	<b>24,06,184/-</b>	<b>26,14,142/-</b>	<b>50,20,326/-</b>

Tichuan, free text book sum atang hian transportation leh distribution tur hi a daih loh thin avangin State Project Office management sum hman tel thin a ni.

(c) Supplier kaltlanga lei kum chuan free text book supplier te hian State Project Office kaltlanga District to School level thleng tur hian thla khat leh a chanve atanga thlahnih chhung vel an mamawh thin.

Tin, direct-a printer hnen atanga lei a nihin kar thum (3) emaw kar li (4) emaw vel a ngai thin.



- (d) A hun takah zirlaite hian free text book hi an dawng tlangpui a. Supplier/Printer atanga harsatna engemaw a lo awm palh zeuh tumin a hun taka dawn kim loh a awm palh thei.

Pu Speaker, hemi rual hian han tarlan tel ka duh chu tun kumthar session-ah hian text book pawl 1 atanga pawl 5, Pre-School ECCE te telin kan sorkarin free text book hi Class I–V hi a vaiin a sem dawn a. Hei hi kan Chief Minister te, kan Finance Minister ten zirna min ngaih pawimawhpui em avangin ₹ 24,00,000.00 kan mamawh belh pawh Planning leh Finance lamin min pe thei dawn a. Chuvang chuan nu leh pa ten zirlaibu an lei belh ngai lovin kumin chu Class I–V hi a thlawnin zirlaibu sorkarin a pek theih chin, sorkar enkawl school-a zirlai naupangte hnenah a pe dawn a ni. Chutih rual erawh chuan Pu Speaker, zirlai nu leh pate hian bu hnih khat an lei belh tur a awm, a thlawna kan sem thin bak hi lei mang lova an fate kumtluan pui mai mai hi an lo awm thin a, helamah hian fate kan enkawlna chungchangah nu leh pate kan thanharh a tul khawpin ka hria. Chuvang chuan kan fate zirnaah zirtirtute leh nu leh pate kan tan tlan tak tak hi a ngai a ni tih ka'n sawilang tel duh a ni.

**SPEAKER :** Pu Ngurdingliana kha a phar hmasa a, han zawt rawh se.

**Dr. NGURDINGLIANA :** Pu Speaker ka lawm e. Kuminah lehkhabu chhut thar a tam em em a. A hun takah peihfel an ni bawh hi lawmawm ka ti a. Amaherawhchu, lawmawm ka tih rual rualin sorkar atanga thu chhuak tawh, 'a tam thei ang berin Printing & Stationery i dawr ang u,' tia order chhuak si kha kuminah kan zawm tha lo em em a. Horticulture Minister zahawm tak kha chuan theih ang ang khan a pan tir niin kan lo hria a, a lawmawm a. Kumina a volume ringawt pawh han en hian sorkar sum inpeizawn tawn theihna boruak chu a thleng si a, chuvangin tun kumtharah hi chuan ngaih pawimawh theih hram ni se ka va duh em ka ti a.

Tin, pahnihna, min chhan theih tho ka ring a. Kumin syllabus lehkhabu thar chhuahah hian NCERT milin pawl engzatah te nge syllabus siam a nih tih kha min chhan theih chuan ka'n zawt nghal ni rawh se.

**Pu LALRUATKIMA** : Pu Speaker ka lawm e. A hun takah an dawng thin ti khan kan Minister zahawm tak khan min chhang a. Kar leh maiah academic session an tan dawn a, tah chuan an dawng hman dawn em tih kha ka zawhbelhna ni sela.

Tin, zirlaibu hi kan ngaihthlak tak ang khan syllabus kan thlak zing hle mai a. Nikum lamah te pawh kan sawi tawh a he House zahawm takah hian, ni (sun) te kha ti hian an rin bial tawp mai a, a lemah khanin naupang tan a hriat hleih theih loh a, khang ang te kha siamthat a ni em tih te, paper quality pawh kha tha deuh kan lo ti tawh ang e an tih kha an ti thei ta em tih kha ka zawhbelhna ni sela.

Tin, a dang lelah chuan hei free text book hi Bengali Medium, Lungsan Sub-Division huamchhungah khanin an pe thin niin ka hria a, an hmang chuang silova a chuang liam mai mai a ni si a, hei hi engnge a awmzia tih ka zawhbelh a. Tin, tunhnaia text bu hlui lak khawm mek hi a thar vek pek ni baw si karah khan eng atan nge an tih. Tin, Tripura Refugee Camp a school te khu free text book pek an ni ve em tih ka zawhbelh a ni e.

**SPEAKER** : Awle, Pu Zoram Sangliana'n zawt law law sela, zawhbelhna kha chu a tawpna ni rawh se aw.

**Pu P.C. ZORAM SANGLIANA** : Pu Speaker, ka'n zawhbelh duh chu, wawinah chanchin hriat nuam tak mai a rawn puan, pawl khat atanga pawl nga zirlaiten a thlawna zirlaibu an dawng tawh tur han hriat hi three cheers pek

hialna tlak niin ka hria a kei chuan. Chutihruah chuan kuminah chauh nilo kum lo kal lehzel turah kan Minister hian heng bak te tichho zel tur hian tan a la chho thei zel angem tih ka zawhbelh a ni e.

**SPEAKER :** Awle, Minister zahawm tak Pu H. Rohluna chhang turin i lo sawm ang.

**Pu H. ROHLUNA, MINISTER :** Pu Speaker, zawhbelhna a tam deuh hlek a, ka lo chhinchhiah hman lo palh a engemaw a nih pawhin i phalnain memberten min remind leh mai se a thain ka ring.

Member zahawm tak Dr. Ngurdingliana zawhbelhna Printing & Stationery-ah hian engatinge zirlaibute hi chhut tir a nih mai loh tihhi, hetia han ngaihtuah mai chuan thil awm tak a ni a. Amaherawhchu Pu Speaker, Class I – V text book te hi NCERT ta kan adopt vek a ni tlangpui tawh a, Class VI, VII, VIII te hi chu MBSE lamin an la khawih a. Chuvang chuan an khawl neih size hi NCERT standard size lehkhabu nen a inmil chiah lo a ni. Chuvangin, pawn lamah kan chhut tir lo thei lova. Nikum hmasa erawh chuan anni nen tang tlangin Printer dang te hnenah order-in chutiang chuan anni pawhin tlawmngaih an chhuah a, kan mangang a, a hun takah neih loh palh te kan hlau a, nikum kha chuan theihtawp min chhuahpui a, anni kaltlang chuan kan ti tho a. Tun kumah erawh hi chuan Pre-School bik hi chu kan pein ka hria, a vaiin ; chu chu School Education Department lam kut a ni a, Class I –V hi chu SCERT kut a ni a, chuvang chuan Printing & Stationery lamah hian kan ti ta lo niin ka hria.

Tichuan, text book NCERT ta kan adopt hi Mizo leh English Medium-ah hian a inang chiahin text book hi siam a ni a, English ami hi Mizo tawnga lehlin a ni a, chutiang chuan private school thleng pawhin tunah hian zirtir an ni, pawl khat atanga pawl nga thleng a ni tuna kan hman mek hi chu.

Tichuan, member zahawm tak Pu Lalruatkima zawhbelhna a hun takah text book hi (kar leh maia tan tur a ni si a) an nei thei ang em? tih hi, nei thei turin theihtawp chhuahin tunah hian tan kan la a ni. Tunah hian 64% hi chu State Project Office lam a thleng tawh a, print zawh sa hi tlem la thleng lo a awm a, chungte pawh chu sem chhuah tur in a hun takah a thlen theih ngei tun thleng hi chuan kan la beisei a ni.

Paper quality chungchangah chuan ni e, sum kan neih dana a tha thei ang berin kan ti a. Tun kum kal meka kan hman mek pawh hi a quality a tha thawkhat viau a ni.

Lungsen SDEO huam chhunga mite hi, ni e, a tlangpui thuin, zep thu a cheng lova, Bengali tawng hi an zir tlangpui. Tunhma atanga lo tih tawh a ni a, chu chuan Assam lam lekhhabu hi an hmang a. Mizo emaw, English Medium emaw hi a hranpain free text book kha an hnen lamah an pe chuang lova. Khang an hman kha a theih ang angin an lo thawhpui zawk a ni.

Tichuan lekhhabu hlui lakkhawm chungchang chu, hmannah kan sawifiah tawh a. Hei hi Library atan te leh tute emaw kum laklawha lekhhabu lo tibo te an awm palh takin tih thua a thlawna sem vek tho a ni a, chuvangin hman tangkai loha dah mai mai ai chuan sikulah hian dahthat ni ta se tangkai zawka hman theih dan a awm ang tih thu hlaa tih a ni a, tihluhna a ni chuang lova. Nikuma lekhhabu hi thlak a ni chuang lova. Tun kum kal meka kan hman hi academic session tharah pawh hman tur a ni, a lekhhabu pangngai kha. A text book chu a inang dawn a ni.

Tichuan Tripura Refugee Camp-ah hian free text book hi keimahni lam SSA sum sengin an pe lo. Amaherawhchu, keimahni syllabus-a an lekhhabu mamawh erawh hi chu anmahni lamin a sum an pe a. A lekhhabu an mamawh ang chu helam atangin an mamawh zat an rawn hrilh a, chu chu an lei tir a ni.

Tichuan, member zahawm tak Pu P.C. Zoram Sangliana'n a zawhbelhna, a thlawnin pek theih zel a ni angem tih chu, tunah mai hi chuan Pu Speaker, ka sawi lawk thei lova. A theih ang angin zirlaite tana tha turin sorkar hian tan a la zel a ni tih kha ka chhan theih tawk a ni e. Ka lawm e.

**SPEAKER** : Awle, duhtawk tawh mai ila. Zawhna No. 172- na kan tan ang a. Zawhna neitu Pu Vanlalzawma, MLA zahawm tak zawt turin sawm ang.

**Pu VANLALZAWMA** : Pu Speaker, ka zawhna No.172-na State Day, Mizoram holiday-a a tel loh chungchang hi vawiinah hian a chhuak dawn tih ka hre lova. Ka ngaipawimawh si a, niminah Chief Minister Demand sawinaah ka thiam ang tawkin ka sawi a, a pawimawh dana ka hriat te. Chief Minister khan a khaikhawmnaah a rawn chhang fel tawh a. Chuvang chuan zawhna tam zawk zawh a nih theih nan ka skip mai ang e.

**SPEAKER** : A lawmawm e. Zawhna 173-naah kan kal thei ta a, a zawhna neitu Dr. Ngurdingliana zawt turin sawm ang.

**Dr. NGURDINGLIANA** : Pu Speaker, member zahawm tak takte zawhna atangin kan Minister-in tun session kal mekah a rawn chhan tawh avangin kei pawh ka zawt lo mai ang e.

**SPEAKER** : Zawhna No. 174-na, a neitu, Dr. K. Beichhua, MLA zahawm takin zawt se.

**Dr. K. BEICHHUA** : Pu Speaker, School Education Department changtu Minister zahawm tak, Pu H. Rohluna hnena ka zawhna chu, Mizorama zirtirtute zingah school computer mahni tana hmang an awm em? Awm ta se, mi engzat nge?

**Pu H. ROHLUNA, MINISTER** : Pu Speaker, member zahawm tak, Dr. K. Beichhua zawhna hi hmannah zawhbelhna a rawn siam khan, a lo chhuah hunah hei hi chu kan inchhang dawn nia kan ti a. Hei, a lo chhuak ta tak tak a, a lawmawm khawpin ka hria a, a hmasain kha kha ka'n sawi lang duh a.

Starred Question No.174-na chhanna chu, Mizoram zirtirtute zingah School Computer mahni tana hmang an awm tun dinhmunah hriat a ni lo tih a ni.

(b) Tun dinhmunah an awm hriat a ni lo tih a ni e.

**SPEAKER** : Zawhbelhna a awm em ni?

**Dr. K. BEICHHUA** : Pu Speaker, Vanglaini kha ka rawn keng ta lo a ni, a chhuah ka ring lova. Kan Minister ngei thusawi kha ka chhinchhiah thlap mai a. Zirtirtuten school computer kan hmang hi a pawh hle mai, tih kha ding lamah chuan a awm ngei mai a. Vawiina min chhanna leh a hma a thusawi a inang leh ta tlat lo mai a. Tunah hian an lakhawm leh ta vek nge, tih leh computer hi a nihna dik takah chuan tunlai khawvelah chuan.....

**SPEAKER** : Engtika sawi nge tih a awm em? Ni lo e, engtika mi nge? A copy chu nei kher lo mah la. A copy i neih hunah i zawt tha leh mai dawn nia, minister khan a sawifiah thei em?

**Dr. K. BEICHHUA** : Pu Speaker, a copy ka rawn keng lo tlat mai a. Hmanni khan chuan ka rawn keng reng a. Vanglaini a ni a, a ni chiah ka lo chhinchhiah tawh lova. A chhuah ka ring tawh lova, a sawi ngei a ni, chumi copy pawh chu kan la nei thei ang.

**DEPUTY SPEAKER** : Pu Speaker, hemi Business list hi nizan lamah an dawng ve lo em ni aw? Kan dawng lawk vek thin a. Hei a zawhna a chhuak a, rawn ken awm tak a ni a, a nei a nih chuan.

**Pu H. ROHLUNA, MINISTER** : Pu Speaker, hmanni kha chuan a sawilang zauh tawh a. Vanglaini-ah a chhuak a tih kha, a chhuah pawh a chhuak maithei. A chhan chu tunhmain computer te sorkarin school-ah a pe a, zirlaite hmasawna atan, an School-ah pek a ni thin a. Mahse, zirtirtu thenkhat mahni ta ang maia in lama lo kawlte hi an awm thin tih sawi a awm thin a. Chumi chungchang chu SCERT a meeting kan neihnaah ka sawichhuak a. Chu chu chanchinbu-ah a chhuak reng a ni. Mahse, tunah hi chuan kan fimkhur tlang tawhin ka hria a. A awm zel palh te kan hlauh avangin warning inpek nan te pawh thil tha a ni a. Tin, tunhma te chuan a awm ve bawk a ni tih kha thudik a ni tih ka hre bawk a. Chuvang chuan insiamthat nan ka sawilang reng a ni. Mahse tun dinhmunah hi chuan khatianga mahni in lamah emaw, mahni ta anga zirlaiten an zirna tur mamawha sikulin a hman tur hmang lova mahni tana kawl chu kan hre lo a ni tih kha tuna ka chhanna chu a ni.

**SPEAKER** : Awle, zawhna No. 175 naah kan kal thei ta e. A zawhna neitu MLA zahawm tak Pu Lalruatkima zawt turin sawm ang. (a),(b),(c),(d) hi a tam lutuk thin, chumi piaah lamah zawhbelhna kha a tam leh chuan a buaithlak thin a, le, zawt rawh le.

**Pu LALRUATKIMA** : Pu Speaker, ka lawm e. Soil & Water Conservation Department changtu minister zahawm tak chhan atan ;-

- (a) Kum 2011-2015 chhungin NLUP atan sum engzatnge hmuh a nih? A year wise-in?
- (b) Eng trade-ah te nge hmalak a nih a, heng trade-ah te hian beneficiaries engzatnge awm?
- (c) Beneficiaries-te hnenah hian sum engzatnge pek a nih a, hamthatna dang eng te nge pek an nih?

(d) NLUP hmunphiah hi engzat man nge thar a nih tawh?

**SPEAKER :** Department neitu Minister zahawm tak Pu Lalrinmawia Ralte chhang turin sawm ang.

**Pu LALRINMAWIA RALTE, MINISTER :** Pu Speaker, MLA zahawm tak Pu Lalruatkima, Aizawl West-II bialtu zawhna starred Question No.175-na chhanna chu :-

(a) Kum 2011-2015 chhunga NLUP atan sum hmuh zat chu hetiang hi a ni:-

2010-2011	-	₹ 14,15,80,000.00,
2011-2012	-	₹ 26,86,54,000.00
2012-2013	-	₹ 33,05,00,000.00
2013-2014	-	₹ 31,50,00,000.00
2014-2015	-	₹ 24,27,30,000.00
TOTAL	-	₹ 129,84,64,000.00

(b) NLUP Scheme-ah hian heng trade hrang hrangah hian hmalak a ni :-

1. Broom 8402 beneficiaries
2. Rubber 1456 beneficiaries
3. Coffee 1598 beneficiaries

TOTAL - 11456 beneficiaries March ni 9 figure a ni hei hi.

(c) Beneficiaries te hnenah hian hetiang hian pek a ni a, hamthatna dang pek an ni lo. Hmunphiah chingtute hnenah ₹ 88,000.00 zel, Rubber chingtute hnenah ₹ 1,00,000.00 zel, Coffee chingtute hnenah ₹ 88,000.00 zel pek an ni.

(d) NLUP hnuai hmunphiah thar tawh chu kum 2014- 2015 thlenga record a alan danin 85968.21 qtls. a ni a, Kg 1 ₹ 30 (minimum) a chhutin ₹ 25,79,04,630.00 a ni, Pu Speaker.

**SPEAKER :** Pu Lalruatkima, zawhbelhna zawt turin ilo sawm ang.



**Pu LALRUATKIMA** : Pu Speaker, ka lawm e. Beneficiaries te hi market ngaihtuahpui an ngai em? tih kha ka zawhbelhna ni sela. Tin, check gate-ah hian engtingge NLUP beneficiaries an ni tih an inhriattir theih dan tih kha ka zawhna ni sela. Tin, heng trade pathum broom te, rubber te, leh coffee-ah te hian RKVY atangin pawisa an dawng em tih leh rubber board leh coffee board te an awm a, engtingge department te nen hian hma an lak tlan tih kha ka zawhbelhna a ni e.

**SPEAKER** : Pu Rinawma'n zawhbelh sela

**Er. LALRINAWMA** : Pu Speaker, ka lawm e. Thil hming hi a pawimawh a, khumi Mamit kawng Rawpuichhip velah khuan 'Water -shed Daleswari' tih a inziak a, a piahah hian, 'Tlawng' tih a in bracket zawk a. Kan ram a ni a, Mizoram, hei hi engvanga hnamdang tawnga inziak nge a nih tih ka zawt e.

**SPEAKER** : Minister zahawm tak chhang turin sawm mai ang. A dang a awm tawh lovin ka hria, Pu Piana kha a phar emaw ka ti a.

**Pu LALRINMAWIA RALTE, MINISTER** : Pu Speaker, ka lawm e. Hmunphiah hi a market a ngai vak lova, a lei duh hi an awm reng a. Amaherawhchu, a leitute'n an lei dan hi a rate a danglam theih viau avangin NLUP Marketing Board lam atang khan ka hriat sual loh chuan a tlawm berah kg-ah ₹ 30/- tura tih kha a ni a. Nichina ka chhanna pawh kha Pu Speaker, District hrang hrangah hian a taka an lei dan hi a inang chiah lova, a tlem thei ang berin kg a ₹ 30/- hian chhut ngam niin kan hria a. Chuvanga ₹ 30/- a rawn chhut kan ni a. Vaibelchhe 25 chuang lai NLUP hmunphiah manah hian a lut tawh a, a hlawhtling pawl tak te pawh a ni awm e.

Amaherawhchu, market hi mumal deuh zawka a kal hi a dik zawk em aw tih ngaihtuahna kan sorkar, kan hotute atang pawhin a awm a. Forest department atangte pawhin lo buaipui a, lo auction a, lo tih ve fo te a nih ve bawk nen, rualkhai

deuha tih tumna te hi a awm a. Kuminah hian kan tifuh thei chiah bik lova, regulated market neihte pawh hi a tha lawm ni, tih te pawh hi sawilan a ni a. Meghalaya-ah pawh zir chiang tur te pawh kan han intir a. Amaherawhchu, kan duh ang chiahin thil kan la tifel hman lo deuh a. Kum thar lamah chuan hlawk zawk leh man man zawka kan hmunphiah chingtuten an hralh theihna tur leh a lei tuten an nawm an maka kan hmunphiah chingtute an tihduhdah lohna tur kawng hi zawn kan tum a. Chu chu tih theih pawh kan tum a, kan hotute ruahmannain.

Rubber bikah hian ka hriatsual loh chuan, NLUP Rubber hi a la thar chiah lo a, a hnai lak chhuah hi a la awm chiah lovin ka hria a. Chuvang chuan a market hi kan la buaipui lem lova. Kum sarihna velah chuan hnai theih a ni a, kumin chuan a hmasa lam hi chu an hnai tan thei mai awm mang e aw, kan ti deuh a. Amaherawhchu, Rubber Board hi a awm a, Tripura-ah khuan Rubber Board khuan hmalakna mumal tak a neih avangin a market-ah chuan kan buai lutuk chu kan inring lem lova.

Coffee bikah hian Coffee Board hian Kolosib-ah office an nei a, kan hriat angin. Pilot project a lo kalpui Soil & Water Conservation hnuaiyah hian kan bial Hachhek Constituency chhungah khuan Hriphaw khua-ah khuan Coffee chingtu an thahnem hle a. An tharchhuah pawh a tam thawkhat tawh hle a, market hi zawnpui an ngai vak lova. Amaherawhchu, a man inpek thuah hian buai a awm deuh hlek thin a, department-ah te pawh an rawn zualko ve thin a farmer te hi. A tlangpui thuin kum khata an thar chhuah zawng zawng zat ve hi a cash-in a kum la la ah chuan an dawng a ni. A chanve dang kha a kum lehah an pe leh thin a, a thar chanve leh nen, an payment system hi a buaithlak khawp a.

Amaherawhchu, Rubber Board lam hian harsatna an nei ve tho a. Coffee rate chu entirnan, Brazil-in a thar tam viau chuan khawvelah a rate a chhe mai a, Brazil-in an thar tlem viau chuan khawvelah a rate a sang leh mai a. Khatiang deuh kha a nih avangin Coffee Board hi dem lutuk theih pawh an ni chiah lova. Tin, kan Coffee

chingtute pawh chuti lutukin an phunnawi hranpa lem lova, complaint lutuk sawi tur an nei hran lo a ni. Sawi tak ang khan market thua chuan a vai hian harsatna lutuk tunah chuan kan nei lovin ka hria a.

Tin, NLUP Beneficiaries hmunphiah chingtute hi engtinge gate-ah identify an nih ang tih lai kha; kan hriat theih chinah chuan beneficiaries list hi Directorate-ah kawl vek a nih avangin a chingtute hmunphiah hralh duh an awm a, an rawn zawt a nih chuan Directorate lam atangin anmahni nihna chianna tur la turin kan hrih thin a, hei hi an ti zel turah ka ngai a ni Pu Speaker.

RKVY atangin tanpuina an dawng em? tih lai hi chu, RKVY atang hian NLUP beneficiaries te hi a hran ngat a va thuam nawn lehna lam chi a awm ka hre chiah lova. Amaherawhchu RKVY hnuaiah hian a ram leilung enkawl na te, Soil erosion venna kan tih ang chi te leh tuikhuah siamna tih ang chi te eng eng emaw a awm theih ve avangin Coffee chingtute area-ah a project kha a lo tlalut a nih chuan chu chu NLUP beneficiaries hian an lo hmang tangkai thei bawka ni.

Member zahawm tak Tuikum bialtu Er. Lalrinawma zawhbelhna Talesuari (Tlawng) tih kha chu engtik kuma an ziah nge tih ka hre chiah lova, a thai rehdan kawng kan lo zawng dawn nia. Ka lawm e.

\*Speech not corrected

**SPEAKER :** Zawhna dang 176-naah kan kal thei ta a, zawhna neitu MLA zahawm tak Pu Lalthanliana i lo sawm ang

**Pu LALTHANLIANA :** Pu Speaker, ka lawm e. Agriculture changtu Department zahawm tak chhan atana ka Starred Question 176 na chu – Kum 2014-2015 chungin plastic pipe district wise-in kan lei zat min hrih thei em? Farmer hnenah engzatnge pek chhuah a nih? Ka lawm e.

**SPEAKER** : Agriculture Minister zahawm tak Pu R. Lalzirliana chhang turin i lo sawm ang.

**Pu R. LALZIRLIANA, MINISTER** : Pu Speaker member zahawm tak Pu Lalthanliana zawhna chhanna chu –

Kum 2014-2015 chhungin central scheme chi hrang hrang – RKVY, NFSM leh NMSA (RAD) hnuaiah HDPE pipe chi hnih 75 mm leh 25 mm te lei a ni a, District-wise a kan lei zat leh farmers te hnena pek chhuah dan chu hetiang hi a ni :-

<u>District</u>	<u>Pipe Size</u>	
	<u>75mm</u>	<u>25mm</u>
Aizawl	169 Nos	132 rolls
Lunglei	649 Nos.	223 rolls
Saiha	90 Nos	37 rolls
Champhai	597 Nos	228 rolls
Kokasib	840 Nos	210 rolls
Serchhip	660 Nos	174 rolls
Lawngtlai	660 Nos	117 rolls
Mamit	760 Nos	191 rolls
Central Store	709 Nos	131 rolls
<b>TOTAL</b>	<b>5,494 Nos</b>	<b>1,443 rolls</b>

Hei hi a leina man zawng zawng chu ₹ Nuai 8553500 a ni. Tender chhuahin Zonun Enterprise, Khatla a chhang hniam ber a nih avangin pek an ni a. Chu chu farmers te hnenah 50% subsidy a pek chhuah leh a ni.

**SPEAKER** : Awle, zawhna hun a tawp ta a, thildang kan tih hmian vawiinah hian Minister zahawm tak pakhat leh MLA zahawm takte pathumin he House chhuahsan dilna an thehlut a, kan phalsak a ni. Chungte chu – Minister zahawm tak Dr. B.D. Chakma, Parliamentary Secretary zahawm tak Pu Hmingdailova Khiangte leh Pu

T.T.Zothansanga leh MLA zahawm tak Pu Chalrosanga Ralte (hei hi chu niminah kan puang tawh a) leh Pi Vanlalawmpuii Chawngthu, hemi te hianin House a awmluh phalna an rawn dil a, kan phalsak a ni tih kha ka puang e.

Tunah chuan Laying of Papers-ah kan kal ang a, Pu Lalsawta, Finance Minister zahawm takin paper pathum lay tur a nei a, chungte chu a rualin lay mai sela. Amah i lo sawm ang.

**Pu LALSAWTA, MINISTER** : Pu Speaker ka lawm e, Statement of Six Monthly Review of the Finance Minister on the Fiscal Position of the Government of Mizoram for the Second half of 2013-2014 (October, 2013 March, 2014) leh Statement of Six Monthly Review of the Finance Minister on the Fiscal Position of the Government of Mizoram for the First half of 2014-2015 (April, 2014 – September, 2014) heng paper te hi he House zahawm takah hian ka rawn lay e.

**SPEAKER** : Awle, a copy kha Member zahawm tak te hnenah sem ni se. Tunah chuan Pu T.Sangkunga Subject Committee-II Chairman-in Report pathum present tur a nei a, a pathum hian wawi khatah rawn present mai se. Amah i lo sawm ang.

**Pu T. SANGKUNGA** : Pu Speaker ka lawm e. Vawiinah hian Subject Committee-II in Third, Fourth leh Fifth Report te kan rawn buatsaih chu i phalnain Chairman ka nihna angin he House zahawm takah ka rawn present dawn a. Kan member te chu, member zahawm tak tak Pu P.C. Zoram Sangliana, Pu Nihar Kanti Chakma, Pu R.L. Pianmawia, Pu Vanlalawma leh Pu Lalruatkima te an ni a. Kan present tur Third Report relating to Border Area Development Programme under Rural Development Department-ah hian BADP Rural Development Department hnuaiia hmun hran hran ami kan en a, an harsatna ber chu a system a ni a. Financial Year pakhat chhunga thawh tur thui tak tam tak kha kum tawp lamah a hlawmin an rawn sanction a, hna thawh hmian draw loh theih a ni lova. Chuvangin Finance Department nena an inkarah te, audit-ah te

pawh harsatna an tawh nasa hle tih kan hmu a. A system hi Finance Department te pawh kan sawipui a, 'in department pahnih hian a solve dan lo zawng teh u', te kan ti a. Rural Development Department hian harsatna an lo tawh nasa khawp mai.

A dawt lehah chuan Fourth Report hi 'Action taken by the Government on the Recommendation contained in the Ist Report of Subject II relating to Pollution Control Board', hi Environment & Forest Department hnuai mi a ni a. Hetah hian kan ngaih pawimawh em em chu Lungli luih khuan mi 10 lain tuibur factory an lo siam a. Pollution Control Board ami-te kan han ko a, tibo turin kan duh a. Anni pawhin lehkhate an lo pe a. Tuibur thlawr hian Hrisel lohna nasa tak a siam a. Khu luih khuan rannungte pawh an awm thei tawh lova, an pul vek a. Tin, Aizawl High School, Republic Veng-a awm te pawh khuan rimchhia an ti em em a, ITI leh Republic Veng pawh khuan an manganpui a. Hemi chungchang hi nasa takin Pollution Control Board amite kan sawipui a. Thil chi hrang hranga ziah kual leh engemaw sawi kual mai ringawtin an kal a. A tirah pheh chuan Court-ah thubu ai a awm an ti a, a lo awm leh si lova. Khu thil thalo tak khu tihbo tumna a awm lo emaw ni aw kan ti hial a. Chuvangin, kan han zir chiang kan han zir chiang a, a Department te pawh kan han sawipui a. Hmanah Pu Vanhela D.C a nih lai khan ar leh ui chhuah khapna hi Dan-ah awmlo mahse ar leh ui chhuah a khap thei a. Chuvangin, will a awm a ngai a ni te kan ti a, kan sawipui nasa a. A tawpa kan tih theih dan bera kan ngaih tak chu Dy. Commissioner, Aizawl leh S.P Aizawl hian tang dunin hetiang ram tana tha lo na na na, an registration pawh valid lo, khulai ami chauh pawh ni lovin, Aizawl chhehvela thil hrisel lo, mihring hriselna atana tha lo tuibur thlawr hi titawp ngei ngei turin D.C leh S.P hian hma lo la rawh se kan ti a ni.

Tin, chubakah Bye Medical waste Management & Handling Rule, 1998 hnuai hian Committee pahnih Environment & Forest leh Health Services-ah an lo din ve ve a. Han en chuan din thei hi an ni deuh ve ve baw si a. Hnathawk thei lovin Committee pahnih kha a lo awm ringawt mai a. Anmahni Department ngawt tan chuan tihngaihna a awm lo ve ve a ni a. Department pahnih te hi ko dunin, 'Committee

pakhatah insiam mai teh u, Chairman awm lohna khan member te an nei ang a', kan ti a. Tichuan, Environment & Forest Principal Chair-na hnuaiiah State Advisory Board on Pollution Control Board chungchang leh state sorkar-a advice te pe thin turin Committee pakhat kan din tir a, lawmawm kan ti hle a.

A dawt lehah chuan Mizoram House, GAD hnuai ami, Delhi leh Kolkata leh Guwahati kan en a. Thil hi han en chet chet hi chuan tha lo hi a lo tam khawp a. Pu Speaker, keini ho pawh hi tar lam kan ni a, min han exam chet chet se chu tha lo lai hi doctor ho hian an hmu teuhin a rinawm a. Khatiang deuhhlekh khan House kan han enchik chu thil thalo a lo tam khawp mai a. Old Balygunge Kolkata ami pheikhuchua lo hniamin a lo chhe nasa mai a. A bula in sak rit tak mai, sang em em avangte khuan a leithe khu a hniam a ni an ti a. Chuvangin, a lo hlauhawm hle mai a. Sak that vek a nih loh pheichuan a hlauhawm ang an ti a. A bangah thing, hmawng ang chi te hi a lo chawrin, a lo awm dur dur hlawm mai a. Khatiang khawpa chhia kha a ni a. Kan Principal Secretary, PWD in a zu enzui vat a. GAD leh PWD in sawi dunin, action lak dan tur hi la ngaihtuah ni se an ti a ni.

Tin, Mizoram House, Salt Lake, pawh rin angin a lo tha tawh lova. A lo chhe tawhin, tih tur a lo tam hle mai a. Chuvangin, Mizoram House, New Delhi leh Kolkata tan hian pawisa dah a siamthat vat a ngai a ni kan ti a. Pawisa te tun kan BE-ah hian Finance leh Planning lamin an dah ta a. Kan Finance Minister zahawm takin Budget a pharhah khan ₹ 80.00 lakhs Delhi atan, Kolkata atan ₹ 84.00 lakhs kan hmu a. Chubakah a chhe nasa ber Old Balygunge ami khu la exam chian turin an ti a ni.

Tin, chubakah Mizoram House-a thawkho Driver te, Grade IV te leh Cook hote hian Mizotawng a basic tak tak tal hi chu zir teh se. Rei tak an awm pawhin tirh an har em mai, an buaithlak em mai kan ti a. An Resident Commissioner te pawhin, 'hei hi chu a dik khawp mai, training kan lo pe ang e', an ti a. Tin, a thawktute hrim hrim pawh hma an sawn khawp mai. Keipawh ka zuk zin nawnin, ka zuk hmu thliah thliah hlawm a.

A hmalak chuan a thawktute pawh Guwahati thlengin helping attitude an neiin, an mi dawnsawn danah-te pawh hma an sawn hle-in kan hria a. Heti pathum hi Pu Speaker, i phalnain he House-ah hian ka rawn present e. Ka lawm e.

**SPEAKER** : Aw le, a copy kha sem ni se.

Aw le, tunah chuan Legislative Business-ah kan kal tawh ang a. Pu R.Romawia'n "The Mizoram (Land Acquisition, Rehabilitation and Resettlement) Bill, 2016" he House-ah hian introduce phalna rawn dil se.

**Pu R. ROMAWIA, MINISTER** : Pu Speaker, "The Mizoram (Land Acquisition, Rehabilitation and Resettlement) Bill, 2016" hi he House zahawm takah hian introduce phalna ka rawn dil e.

**SPEAKER** : Minister zahawmtakin introduce a rawn dil a, kan phal em ? Aw, kan phal a ni. Tunah chuan koh nawn ngai lovin introduce sela, sawiho turin move nghal mai sela vawikhatah a tha ang e. Introduce turin kan sawm ang, tichuan, House a sawiho turin a move nghal mai ang a.

**Pu R. ROMAWIA, MINISTER** : Pu Speaker, "The Mizoram (Land Acquisition, Rehabilitation and Resettlement) Bill, 2016" hi he House zahawm takah hian ngaihtuah turin ka rawn introduce e.

Pu Speaker, a copy kha kan member zahawm tak te kha sem vek tawh an niin ka hria a. Chuvangin, chair lam atanga min duh angin he Bill chungchang sawifiahna te kha ka han nei ang e.

He Bill hi a history deuhhlekte han sawi ta ila. A pakhatna-ah chuan Land Acquisition Act 1894 ka'n sawi hmasa ang a. British India huam chhungah Land Acquisition Dan hmasa ber atan Bengal Resolution I of 1824 chu siam a ni a. Treaties



India pumpui huam turin 1857-ah Act 6 of 1857 chu Dan awm tawhte luahlan turin siam a ni leh a. Chumi luahlan tur chuan Act 10 of 1870 siam a ni leh a. Chumi chu kum 2013 thlenga hman Land Acquisition Act, 1894 a siam khan a rawn thlak chho ta a ni. He tlakchhamna hian India sorkar hi welfare state a ni pawh ti thin mah ila Land Aquisition chungchangah citizen welfare ngaihtuahpuina a chau hle a tih theih a.

Kum 1980 chho velah khan Civil Society Oranisation hrang hrangten sorkar an nawrna avangin Fair Resettlement Policy nei turin hmalak a ni tan ta a. Kum 19 zet a liam hnuin kum 2004- ah chuan Ministry of Rural Development, Govt. of India chuan Rehabilitation and Resettlement policy chu a publish ta a. Chu chu duh khawp lohna a nasat avangin kum 2006-ah khan Civil Society Organisation te nen inrawn tlang chungin National Advisory Council-in draft policy thar an siam leh a, chutah chuan Ministry of Rural Development pawhin 2004 policy chu a hlamchhiah zui ta a. Ministry of Rural Development chuan National Rehabilitation and Resettlement Policy 2007 chu Gazette of India ah a lo publish ta a. Hei hi policy mah ni sela kan ramah pawh kan hmang a ni.

Pu Speaker, he Dan 2007 a awm tak hnu hian Zoramah pawh development project avanga chenna hmun luahlan sak, chhungkaw tam tak a bikin, Indo-Bangladesh border fencing project avanga a khua khuaa sawn ngai te pawh mumal deuh zawka buaipui a ni chho ta a. Hetiang chiah hian Builum khua te pawh Serlui 'B' project-ah khan hetiang hmang hian buaipui a ni.

Hemi hnuah hian Land Acquisition Act, 1894 chu hemi NRRP, 2007 provision te keng tel tur central sorkarin dan thar a siam ta a. 2007-ah khan resettlement te, rehabilitation te, resettlement policy te fun tel tur khan (1894 dan khan a fun tel loh avang khan), Right to Fair Compensation and Transparency in Land Acquisition, Rehabilitation and Resettlement Act, 2013, Central Act No. 30 of 2013 RFCTLARR

Act, 2013 chu ni 1.1.2014 khan Dan siam a lo ni ta a. Chu chuan Dan hmasa kha a lo luahlan ta a ni.

Tuna Right to Fair Compensation and Transparency in Land Acquisition, Rehabilitation and Resettlement Act, 2013-ah hian MRRP, 2007 provision te chu a nih ang diak diak lo deuh leh citizen tana hamthatna nasa zawk awm tura siam danglamin seng luh a ni a. Land acquisition chungchang hrim hrimah chuan, Land Acquisition Act, 1984 provision zuina lai a la tam em em bawk a ni. RFCTLARR Act, 2013 chuan land acquisition a awmin duh reng vang ni lova mimal ram lei luh sak thawi damna, mimal ram lak luh sak thawi damna, solatium rate hi urban area-ah zaa za compensation amount leh rural area-ah chuan urban area atanga hmun hlat dan azirin zaa za atanga zahnih government-in a bithliah turah a dah a ni. Rural mite a duhsak hle a nih chu. Main Land India state mimal ram neitu tam ber ten chhuan engemaw zat chhung roh taka an lo luah leh hman tangkai lai ngawih ngawih development project atana lei luh sak an nih thin avangin. Chutiang hmun atan chuan solatium amount hi awm tak ni mahse, Mizoram tlang ram leh ram chungchanga harsatna la nasat lohna hmun ram pass neitu tam ber te pawhin, an pass huam ram an cheibawl mumal lohna leh acquisition tih dawn pawha ram ui a hneka acquire sak beisei an la tamnaah hi chuan RFCTLARR Act, 2013 in solatium rate a bithliah ang hi a rem thei ngangin a lang lova. Chuvang chuan RFCTLARR Act hi a effective date January ni 1, 2014 atangin a nih ang anga hman nghal mai, Government of Mizoram chuan a ti lo thei lova. Chuvang chuan land acquisition mamawh te pawh direct purchase lo ti mai turin advise pek an ni nghe nghe a ni.

4. Kum 2014 chhovah chuan Mizoram sorkar chuan Indian Constitution Article 371G clause 1, sub-section 4 in “Notwithstanding anything in this Constitution no Act of Parliament in respect of ownership and transfer of land shall apply to the state of Mizoram. Unless the Legislative Assembly of the state of Mizoram by a resolution so decides, provided that nothing in this clause shall apply to any Central Act in force in

the Union Territory of Mizoram immediately before the commencement of the Constitution 53<sup>rd</sup> Amendment Act, 1986” ti a special provision a neih hnuaiah RFCTLARR Act, 2013 hi hmang lova, kan state-in kan mil tura Land Acquisition Dan hran siam tumin hma lak tan a ni ta a ni.

Hetah hian han sawi belh leh lawk ila. Hetilaia India sorkarin Inremna thuthlung bawhzuia Dan a siam that proviso-ah hian 1986 hmaa central Dan emaw kan lo hman tawh kha a nih ang ang khan a seng ta tlat mai a ni. Chuvangin, a nihna ang anga a seng kha kan tan thatna tam tak a awm a. Chin Hills Regulation kan ti a, BEFR, ILP te thleng pawhin tunah khan min humhim sak lawi a ni. Amaherawhchu, Land Acquisition Act 1894-a Dan siam te kha kan chhawm tel a ngai ta tlat mai a nih chu, kha Dan kha an lo siam tawh, an lo hman tawh a nih avangin 1986 a tanga 1.1.2014 thlengin. Mahse, tuna Dan hi 2013-a siam a ni ta a. Chumi avang chuan he provision hian a huam ta lova, chutiang a nih avang chuan Land Ownership and Transfer of Land-ah khan, ‘not withstanding anything in the Constitution’ tih a nih bawk avang khan, India Constitution Article 246 in state leh central Dan siam lo kawp a nih a inmillo a awm chuan central Dan a lal zawk ang tih te. Tin, Indian Constitution 7<sup>th</sup> Schedule-a Concurrent List-a No. 42 nain, Land Acquisition leh Regquisition kha, concurent list a a lo dah bawk avang leh hetih laia Dan inremna thuthlungin a rawn fun tel Dan kan neih avang hian 2013 Dan hi a nih ang anga House-a kan pawm tur a rawn vawm luh hrim hrim kha sorkar pawh hian a rawn tum ta lova. Chu ai chuan hemi a thuneihna kan neih ang hian kan rama Land Acquisition Dan siam hi a rilruk ta a. Advocate General, Government of Mizoram hmalaknain Pu Kapil Sibal, Senior Advocate, Supreme Court chu ₹12 lakh senga biakrawn a ni a, a advice lak a ni a. A advice angin Mizoram sorkar chuan Article 371(g) in protection a siamsakna hnuaiah Land Acquisition dan hran siam turin Revenue Minister kaihhruai Drafting Committee of Mizoram Land Acquisition, Rehabilitation and Resettlement Act chu a din ta ni.

Drafting Committee chuan theih tawp chhuah a hma lain Novemebr, 2015-ah draft Mizoram Land Acquisition, Rehabilitation and Resettlement Bill, 2015 chu a peih fel a. Chu chu Assembly Session ngeia pass chu duhthusam a nih laiin hetih lai hian State Legislative Session neih loh lai a ni a. Chutih laiin Guwahati High Court-in hun rei tak Land Acquisition Dan nei lova Mizoram state a lo awm tawh chu kan dinhmun sawi Chiang tura direction khauh leh urgent tak min lo pek fo avang te, Land Acquisition chungchanga legal vacuum awm reng avanga thuhnawk eng eng emaw sorkarin kan hmachhawn theia a lan vang te, development project thar neihna kawng a dal bawk avanga Dan atana puan a hmanhmawh thlak em avangin Council of Ministers advice angin Governor of Mizoram chuan ordinance ang a promulgate turin chu bill chu 'The Mizoram Land Acquisition, Rehabilitation and Resettlement Ordinance, 2015' tiin kum 2015 December thla tirah approval a pe ta a.

Hei hi No.12018/241/2015/LJD, dated the 15<sup>th</sup> December, 2015 angin notified a ni a. Mizoram Gazette Issue No. 671, dated the 17<sup>th</sup> December, 2015-ah chhuah nghal a ni bawk a. Hetah hian kan member te khan a copy kan hmu lo ve in ti a, a lo dik a. Kei pawh khan hetiang a Printing & Stationery-in government notice hetiang a an siam tawh, an gazette tawh te chuan tunhma khan Ex-MLA kan nih lai pawh khan sorkar Dan siam zawng zawng kha a copy min pe si a. Chuvang chuan, keini MLA zawng zawngte leh a pawimawh zawng zawng chu min pe nghal turah khan ka lo ngai a, ngaihtha deuhin ka awm a. Amaherawhchu, kumthar te a lo nih chhohah khan kan official te ka zawt kual a, 'chutiang chuan Assembly House ngei te pawh a hranin kan pe reng reng hlei nem. Printing & Stationery hian thil harsat avang hian tunhmaa a copy an pek teuh ang kha an lo tichhuak tawh lo nghe nghe a ni', an ti a. 'A khai, kan tisial der a nih chu, chuvang chuan hemi hi ordinance a awm chuan MLA te khan a copy an hmu vat tur a ni a. Tin, Assembly Secretariat te pawhin an hmu tur a ni a. Engatinge tun thlenga hmuh loha a awm mai ? Chuvang chuan theih angin hma la rawh u, tlai deuh tawh mahse kan hriatchhuah chin chinah, a hma thei ang berah an hmu tur a ni', kan ti a. Tichuan hei February ni 15 khan kan rawn sem ta chauh che u a, a pawh hle a.

A chhan chu, keimah ber pawhin hetiang Gazette te chu tihchhuah alo nih kha chuan Gazette copy dawng chin ho kha chuan kan lo hmu vek tur leh department pawimawh pawhin hmu vek tura ngaihna deuh ka lo neih vang kha a ni a. A chhuah hnu thlahnih dawnah January thla a liam a, February ni 15 chauhah in lo dawng kha a paw em em a ni. Tunhnuah chuan hetiang ang thil kan ti leh a nih chuan ordinance kalphung chu sorkar department dangte pawh khan kha kha hre hlawn tawh se a tha khawp mai, chu chu ka'n sawi tel duh a.

Pangana – Mizoram LARR Ordinance, 2015 chu hman nghal a ni chungin Act atana legislate tura buatsaih a nih lai hian siamrem ngai lai a awm leh avangin Drafting Committee chuan February ni 15, 2016-ah a ennawnin a finalize ta a. Tuna House-a kan rawn introduce kha. Drafting Committee-in a finalize ruala a siamrem bakah hian Law & Judicial Department-in a vet angin thumal belh leh section 105, Repeal & Saving thute hi siamthat a nih angin Ordinance anga Council of Ministers kaltlang lova Legislative Assembly-a pharh mai a rem ta lova. Chuvangin, Ordinance awm tho mahse bill thar anga buaipui a ngaih avangin Council of Ministers pawmpuina dil leh a ni ta a. Law Department-in an vet hnu March ni 7, 2016-ah Revenue Secretariat-ah a lo let leh chauh avangin Council of Ministers meeting tura an koh kha an thulh leh ta nghe nghe a. Chumiah chuan agenda-ah khan an han telh hman hram a. Mahse kha kha an thut leh tak loh avangin by circulation-in kan tih a ngai ta a.

Sawi tak angin Mizoram LARR Bill-ah hian sorkar pawmpui ang, sorkar approve kan ti mai ang chu, ram pass ni lo hmanga ram luah, compensate lohna tur, pass neilote sorkar pawmpuina ni lova 'pass ka nei ve', ti ringawt te a ni ang chu, hmanga ramluah compensate loh te. Chutiang mite property, crops pawh chu mirethei BPL te an nih chauh loh chuan compensation pek ve loh tur tih te. Tin, solatium pawh kan ram angah chuan a background kan sawi tawh a 30% of compensation la ni zui zel tur te. Hei hi 1894 Land Acquisition Dan kan hman, Mizoram ami kan hman mek a kha a ni. Langtlang taka social impact assessment neih dan tur te. Social impact assessment hi

nichina kan han sawi ang khan Ministry of Rural Development-in Rehabilitation leh Resettlement Policy a siam 2007 khatilaia an rawn tih ang kha a ni a. Mahse a nih ang diak diak kha chu a ni lova. Compensation chhutchhuah te leh Rehabilitation leh Resettlement rate te pawh kan state mil thei ang berin RFCTLAR zui deuh siin duan a ni a. Land acquisition process hrim hrim hi langtlang (transparent) taka tih a nih dan tur atana Dan zam a ni.

Tin, section 80-ah hian hlemhle taka thil titute hremna tur a awm ta a ni. Compensation leh RR chungchanga thil tihsual a awm a hremna tur section 81-ah hian (section ti ila clause ala ni ang chu) clause 80, clause 81 a ni ang chu kan pass hma chuan, a tel bawk a.

Land Acquisition Act, 1894 kimchan lohna thuam kim si, RFCTLARR Act 2013 ziarang keng tel a nih avanga sawisel tur tam lo thei ang leh Land Acquisition process langtlang leh rintlak, khua leh tuite hmakhaw ngai taka Rehabilitation leh Resettlement provision nei tha ve bawk tura he bill hi buatsaih a ni a.

Tin, he bill hi in han en ang a, a hmaah hian Preamble tih chu kan dah chiah lo na a, a thumahuai ang kan nei a. Khatilaia a section, a clause-in a ken loh kha “to ensure a humane, participative, inform and transparent process for land acquisition for industrialization, development of essential infrastructural facilities and urbanization with the least disturbance to the owners of the land and other affected families and provide just and fair compensation to the affected families whose land has been acquired or proposed to be acquired or are affected by such acquisition and make adequate provision for such affected persons for their rehabilitation and resettlement and for ensuring that the cumulative outcome of compulsory acquisition should be that affected persons become partners in development leading to an improvement in their post-acquisition social and economic status and for matters connected therewith or incidental there to.

Be it enacted by the Legislative Assembly of the State of Mizoram in the Sixty-Seventh year of the Republic of India under the protection guaranteed under the provisions of Article 371G of the Constitution of India, since the Right to Fair Compensation and Transparency in Land Acquisition, Rehabilitation and Resettlement Act, 2013 (Government of India Act No. 30 of 2013) has not been adopted by the Legislative Assembly of the State of Mizoram” ti khan a thu hmatheh kha kan han nei a ni a.

Pu Speaker, he kan Dan thar han introduce-ah hian preamble ka han chhiarchhuah bakah khan bung 13 a awm a, tin, clause 105 a awm a, schedule 3 a awm a, tilaiah hian RFCTLARR Act, 2013 zulzui deuhhlekin Dan dang ang lo tak hian clause 3-naah hian “Application of Act” kan dah a. Khami Act-in a va tinzawn mite kha a niang chu, khami Act va hmanna tura kha, Dan tam takah hian a awm zen zen lova, a Dan huam chung an sawi a, a Dan huam chung hnuaiyah khan definitions an sawi leh a, hetah a Dan-ah hian an lut ta deuh thin a. Hetah erawh hi chuan Application of Act kha hemi Act-in a va kawh tura kha thui deuh tak Clause 3-ah hian dah a ni. NRRP, 2007 leh RFCTLARR Act, 2013 ten an dah pawimawh Chapter II-ah hian Determination of Social Impact and Public Purpose dah a ni a. Chu chu hetilaiah ram va lak tur pawh awm ta sela Social Impact Assessment Committee mumal tak kha, a awm tur a ni a.

Tin, Pu Speaker, tlemin ka’n sawi duham deuh ang a. Hei hi chu land acquisition tan deuh tur kha a ni a, hetilaiah pawh hian Dan kha eng eng emaw kan sawi kan sawi dawn a, nakinah khan kan rawn tih leh tur, amend kan rawn dil leh tur Stamp Act Amendment nen khan inkaihhnawih tlatna a rawn nei dawn a. Chu chu Stamp Act ka rawn introduce hunah ka rawn sawi ang a. Evaluation Committee, Central Evaluation Committee emaw District Evaluation Committee emaw khatianga siam theihna Dan te pawh kha he House hi ka la rawn dil leh dawn a ni. Chungte nen chuan he kan Dan hi tha taka member-ten min pass pui chuan tangkai taka hman a nih theih kan beisei a. Amaherawhchu, khawimaw laiah chhut sual zeuh ‘and’ tih te tel tawh lo tur engmah

zawm nei lo tih angreng te, engemaw chu awm neuh neuhin kan ring a. Engpawhnise, Dan te hi chu siam that zel theih a ni a.

Kan member-ten uluk takin in lo chhiar tawhin ka ring a, a principle chuan hei hi kan ram mamawh engemaw chen chu min phuhruk thei turah kan ngai a ni Pu Speaker. Chuvangin , he House hian uluk taka min sawihopuia ngaihtuahna tak hmanga ram tana tha tura theihtawp min chhuahpui turin ka rawn thlen a ni e. Ka lawm e.

**SPEAKER** : Awle, kan Minister zahawm takin Bill a introduce a, tin, House-a ngaihtuahpui turin a rawn pharh vek a. Tunah chuan sawihona kan tan leh tawh ang a. Nidanga kan rin thin mi pakhat tan minute 10 tih kha la ding rih se a tha awm e. Mi pakhat tan minute 10 sawihona kan nei dawn a ni.

Tunah sawihona kan tan tawh mai ang. Tunge sawi hmasa ber dawn? Aw, Pu Nihar Kanti Chakma.

**Pu NIHAR KANTI CHAKMA** : Pu Speaker, ka lawm e. A hmasa berin Minister zahawm takin hetiang Bill tha tak a rawn pulut hi lawmthu ka sawi a. The Mizoram (Land Acquisition, Rehabilitation and Resettlement) Bill, 2016 hi ka chhiar nual a, a tha ka ti khawp mai. A bikin nichina Minister zahawm takin a sawifiahnaa a sawilan zawk chu a bikin ka bialah hemi chungchang hi problem kan nei nasa a.

He Land Acquisition hi complicate subject a ni a. Tunah Indo-Bangladesh border fencing hi 80% vel an zo tawh a. Hei hian nasa takin social impact a nei a, kan Minister zahawm tak pawhin a hria ang a, he fencing hian ram a tihchhiat bakah mi eizawwna livelihood a tichhia a. Fencing hi kan duh lova, mahse ram venhim nan a nih avangin loh theih loh a ni a. Nichina Minister-in a sawi ang khan, helaia ka tarlan duh chu Rehabilitation and Resettlement Award chungchang a ni a. Sorkarin land an chhuhsak a, a tam ber chu ngaihtuah ta ila, LSC nei mumal lo an ni a, LSC an neih loh



chuan an duh ang khan compensation pawh an dawng thei lova. Khangte pawh kha sorkarin ngun takin ngaihtuah se. Chubakah Award of Solatium, solatium hi out of the 'collector having determined the total compensation to be paid, may, to arrive at the final award, impose solatium not exceeding thirty percent of the compensation amount' a ni a. Pu Deputy Speaker, hetiang a an tih chuan mirethei tak takten an tuar dawn a ni. No. 31-na hi ngun taka ngaihtuah ni se tiin ngaihtuahna ka nei a.

Thil pakhat ka sawi duh chu, Procedure and Manner of Rehabilitation and Resettlement. Hei hi problem kan dawn nasatna a ni a. Nichina an sawi ang khan khaw thenkhat hi bifurcate a ni a, dan angin security hovin an sawi dan chuan nakinah an hung zawh chuan pawnlama awmho kha awm an phal dawn miah lo a ni. Chuvangin, anni tan hian resettlement a ngai a ni. Tun thlengin sorkar hian resettlement tur hi a la buatsaih miah lova. Resettlement atan hian helai hi ka en a, a tlem khawp mai a, "If a house is lost in rural area, a constructed house shall be provided as per the Indira Awas Yojana specification." Hei hi chu Pu Deputy Speaker, a tlem lutuk. Entirnan, ram venna chu kan hrethiam a, duh lo chungin an acquire ta a. Resettlement hi tlemin tihsan deuh ni thei se a tha lo maw tih ngaihtuahna ka nei a ni.

Second schedule-ah tho No. 3, "Each family which is displaced from the land acquired shall be given as monthly subsistence allowance equivalent to the ₹ 3000 per month" a ni. ₹ 3000 per month a nih chuan a tlem lutuk tunlai khawvel dinhmun ngaihtuah chuan expenditure hi a sang chho zel a, cost of living a high lutuk a. Chuvangin, a tlem berah ₹ 10000 tal ni thei se, chuti lo chuan kan mi leh sa ten nasa takin an tuar ang, ₹ 10000 tal ni thei se a tha lo maw.

Thil pakhat tha ka tih deuh chu entirnan, Rehabilitation & Resettlement Committee din tur an ti a. member ni thei tur te chu Member of the Legislative Assembly of the concern area tih a inziak a, a tha a, 'chairperson of the local authority located in the affected area' tih pawh kha a tha a. Ka bial hi hemi chungchangah hian kan tuar nasa

khawp mai a, pass hnuah pawh a hma thei ang berin ding thei se tih kan duh khawp mai. A chhan chu nakinah an sawi dan chuan 2018-ah chuan fencing hi an zo dawn a. An strict lutuk a, tunah pawh buaina hrang hrang leh social impact hi a awm nasa khawp mai a. Chuvangin, nichina Minister zahawm takin a sawi kha, social impact te pawh kan access a ngai a. Nasa takin kan displace a ni a.

Entirnan, ka bialah kan tuar nasa a, sorkar asset, building, playground mimal in, huan, leilet zawng zawng an tichhia a. Chubakah, construction company hi a fimkhur lo em mai. WRC side drain hi laih that a nih loh avangin lei laiin an block a, a block avangin WRC a chim vek a, production te pawh nasa takin a tichhia a ni. Chungte pawh chu sorkar hian a ngaihtuah a ngai a ni. Mi livelihood an tihchhiat chuan khami bik ho kha ngaihtuahin hma la se kan duh a. Pu Dy. Speaker, Bill hi ka support a ni e, ka lawm e.

**DEPUTY SPEAKER** : Tunge sawi ve leh ang? Support tu an awm tawh bawk a, pass kan dil tir mai dawn em ni? Sawi duh kan awm lo maw? Pu K. Sangthuama.

**Pu K. SANGTHUAMA** : Pu Dy. Speaker, han thlir han thlir hian nichina kan Minister zahawm takin a rawn sawi ang deuh hlek khan kan Bill hi duh ang hian kan enchiang hman lo a, kei, a mimal tak pawhin. Bill hrim hrim hi chu kan tih tur pawh a ni a. Pu Dy. Speaker, kan Ordinance-te hi kan hmu har deuh hlek bawk a. Tin, a Bill tak tak pawh hi ni 18-ah khan kan hmu chauh a, thil dang han en tur nen, duh ang a chiang fek fawk a han zir chiang tur chuan hun a bichilh deuh hlekin a lang a. Chuvang chuan, wawinah hian pass mai rih loh pawh hi a tha law'm ni, chiang deuh hleka hetiang thil pawimawhah hi chuan (amend theih zel te phei chu Pu Dy. Speaker, a nih rual rual hian) thil fimkhur thlak tam tak hi a awmin ka hria a. Ngun lehzual zawka la zir a pass te hi a tha law'm ni, enge thil hmanhmawh rum rum a nihna, hun kha leh chen kan kal tawh a, tunah pawh hian kan la kal mek zel a ni a tih kha a bul tan nan ka'n sawi duh a.

Tin, helaiah hian short title, extent and commencement tih a pahnihnaah hian ‘ It extends to the whole state of Mizoram’ tih hi nakinah la rawn hrilhfiah sela. Kan dan siam then thenah hi chuan, Mizoram pumpuiaah hian dan kan siam vek thei lova, ti mai ila. Kan District Council area-ah te hian tih theih lohna te kan nei a. Helaiah hian kan ti thei vek dawn em tih kha ka chiang chiah lova. Chuvang chuan, hengte pawh hi nakinah min la hrilhfiah ngaiin ka ring a.

“Solatium” an tih hi ‘not exceeding’, 30-na, phek-24, “The collector having determined the total compensation to be paid, may, to arrive at the final award, impose “Solatium” not exceedin 30% of the compensation amount”, tih hi nichina kan Minister zahawm takin a rawn sawi, a hma chuan ₹ 100/200 te pawh a lo ni thin ti khan ka’n hria a. 30% a han tlakhniam em em hi chu a tha dawn em ni tih ngaihdaan ka nei deuh hlek a. Compensation pek atanga 30% chauh han pek kha chu tunhmaa kan dan awm, kan Minister zahawm takin a rawn sawi chhuah nen khan a inthlau deuh hlek a. Chu pawh chu ni ta se ₹100/200 ang chi central lamah te a lo nih chuan keini helaia mirethei, tunah pawh kan compensation hi sq ft-ah ₹ 200/= vela siam hi Pu Dy. Speaker, kan la tum a ni a, chuvangin a hniam zawnga in bengbei lutuk hi chu a tha lem em ni tih kha ka ngaihdaan a ni a.

Tunah pawh court-ah kan inkhing uaih uaih a, court lamte pawhin 200 vela tih an la rawn tum a ni a. Chutihlaia kan compensation lak atanga 30% ang hi chu hun kal zel turah a tha ber dawn em ni tih kha ngaihtuahna kan sen chu Pu Dy. Speaker, a tha khawpin ka hria a.

Tin, nichina ka hma ami a rawn sawi phek 50-naah khan, ‘Transportation cost for displace families’ tih te “Each displaced family which is displaced shall get a one-time fianancial assistance up to ₹ 5000 (fifty thousand rupees) as transportation cost for shifting of the family, building materials, belongings and cattle or as decided by the District Collector”, tih te pawh hi tlem chuan a tlem deuh hlek chu a ni. Family tan a ₹

50000 ringawt kha chu thil harsa tak a nih ka ring a. Tin, nichina an rawn sawi, 'Equivalent to ₹ 3000 per month for a period of 1 year from the date of award' a'n tih te pawh kha ka hmaa miin a rawn sawi, hengte pawh hi a tlem deuh hlek chuan a lang a. Chuvangchuan, a hrim hrimin, hei hi ngun leh zawkin en ta ila Pu Deputy Speaker, wawiina ti chuk chuk lo hian. Thil hi chu hmanhmawha tha chi a awm a, hmanhmawh lova tha chi te a awm fo thin a.

Dik chiah chuan, bel tak chuan ka en hman lo a ni, ka pha lova. A chhan chu, session lai a ni a, thildang lo hisap ve te a lo ngai a, chutiang chuan, bel taka en ka hman chiah lova. Chuvangin, kan thiante pawh, Pu Deputy Speaker, an nih ve tho rinna ka'n nei a, bel taka lo chhiar tawk chu in awm maithei a. Chuvangchuan, hei hi wawiinah hian ti thut ta lo ila, la zir chiang leh ila. Tuna kan han sawi ang chi tlem tlemte pawh kha han siam danglam ta deuh ila. Tin, danglam tur dangte pawh a awm thovin ka'n ring a. Chuvangin, 30% ang ringawt kha chu nichina tawite ka'n sawi, per sq.ft. a tihsan an tum laia, mi tam takin an lo pawm laia, court thleng pawhin theihtawpa tan a lak a, kan hneh lo chho zel bawk si a. Chutiang a nih laia hengte pawh hi hniam lutuka kan kal chuan mite pawhin min dem thei lo ang maw tih te kha ka rilruah an awm a. Chuvang chuan, mirethei tam takte an in leh lo kan la laksak zel dawn te pawh a ni maithei a, kan hre lova.

Hemi kan border fencing-ah te pawh, a dik chiah chuan, an tap ve ngawih ngawih a. Pu Deputy Speaker, kan ramte pawh Bangladesh ramah te kan pe chiah chu a ni lova, mahse, kan hungsak a ni, dik chiah chuan. Central sawrkar-in an rawn ti a, a hunglai khan duhthusamin, Pu Deputy Speaker, kan lo enchianpui lo te pawh a ni thei thova. Km tam tak hi keini ram, India ram hi, Bangladesh lampangah tunah hian, kan pe chiah chu a ni lova, mahse, khutia kan hung tlat phei chuan an ram chan ang deuh kha a ni mai a. Khanga mirethei tam tak, tunah khuan an in leh lo din dan turte duhthu angin kan ngaihtuahsak lo bawk si a. Chuvang chuan, hetiang kawngah hian fimkhur deuh hleka ngaihtuahna kan siam theih nan hei hi chu la pass mai lo ta ila, uluk deuh zawkin la

en tlang leh ta ila a tha lawm ni tih kha vawiinah hian rawtna ka'n siam duh a. A zavai chuan hetilalah hian hei hi a tha e, hei hi a tha love, ti a han sawi vak tur phe chu, duh anga ka in prepare tawk loh leh ka chhiar kim tam tawk loh avangin han sawi zung zung tur ka hre lova.

Helai 43-naah te pawh hian kan Committee siam dan chungchangah te hian, 100 acre chin kan laksak dawn chuan Committee, tuna kan siam ang hian, ngaihtuah se tihna lam hawi a ni a. Chuvang chuan, hengte pawh hi 43,56,000 sq.ft. chin chauhah hian ngaihtuah dawn a nih chuan a aia tlem pawh hi kan la la thei tho mai a. Chuvangin, hetiangte pawh hi a tha tawk em aw ka ti deuh a.

43-na a ziah dan chuan 'Where land proposed to be acquired is equal to or more than 100 acre, the Govt. shall constitute a Committee under the chairmanship of the Collector to be called the Rehabilitation and Resettlement Committee, to monitor and review the progress of implementation of the Rehabilitation and Resettlement scheme and to carry out post-implementation social audits in consultation with the public of the concerned village in rural areas and Municipality in urban areas.' a ti a. Hengte pawh hi, 100 acre chu, tin 300 hmun vel emaw dawn lai hi a ni a. Hei pawh hi a mimal nge a sawi a, a lak tur hrim hrim kha heti mai hi chuan chian a har a, a dang lamah hrilhfiahna a awm em tih ka hre hauh lova, Pu Deputy Speaker. Chuvangin, hetiang te te hian ngun zawka ngaihtuah tur hi a la tam viauin ka hria a. Vawiinah chuan hei hi nam liam chuk chuk lo ta ila a tha lawm ni tih kha rawtna ka'n siam duh a ni e, Pu Deputy Speaker, ka lawm e.

**DEPUTY SPEAKER** : Hun inpe chiam mah ila kan zir leh chuang lovang tih te chu a hlauhawm viau bawk si a. Tunge han sawi leh ang le? Tumah phar kan awm lova, Minister ko mai ang aw. Hetia House ngawi renga thut reng hi a nalh pawh a nalh lo, rorel kan ni a, inchuh phat phat tur a ni a. A Bill hi semna a rei tawh a, aw, Dr. K. Beichhua

**Dr. K. BEICHHUA** : Pu Deputy Speaker, he thil hi keini ang tana han hriatfiah, fiah fai taka han hriat theih chi pawh a ni lem lova, sawifuh loh deuhte pawh a awm ang a. Engpawhnise, a tlangpuia kan han en thuak thuak chuan pakhatnaah, Ordinance kha hmanni pawh khan tlem ka rawn mention a. Ordinance December thla a siam daih tawh, Session dawn, Session koh hnu a member-ten a copy kan hmu ve chauh kha thil dik a niin ka hre lova. Chuvang chuan, junior MLA kan ni a, hengte pawh hi a dik pawh ni se, a dik lo pawh ni se, kan experience atan te pawh vanneihna-ah kan chantir ang chu ka ti kha a ni a. Kha kha thil diklo tak mai niin ka hria a. Tin, keini lam pawhin Secretary hnenah ni 3, hemi pass hmam thehluh tur a ni tih lai khan kan lo thehluh lo bawh a, complaint-na inhriatthiam tlannaah ngai ila.

Pahnihna-ah chuan, 6<sup>th</sup> Scheduled area-a awmte hian legislative, judicial leh executive power hi lian taka nei ve an ni a. Central sawrkar hian an right a preserve dan hi special bika preserve an ni a. Chutah chuan, land chungchangah pawh hian Dan an nei tha ve viau a, 'except Autonomous District Council area' tih kha a ni thinin ka hria a, helaiah hian 'whole Mizoram' tih kha a ni a. 'The Constitution 107<sup>th</sup> Amendment Bill, 2007 & 6<sup>th</sup> Schedule to the Constitution Amendment Bill, 2007' ah khan chiang takin a rawn ziaak a. All District Councils tan allotment of land leh anmahni ram chungha leilet emaw, ram emaw chungchanga an thuneihna kha chiang takin a rawn ziaak a. Chuvang chuan, khalai kha a dik zan ang em? Helaia keinin kan lo siam mai hi thil dik lutuk a ni ang em tih ngaihtuahna ka nei a.

Tin, pathumna-ah chuan, Pu Deputy Speaker, helaia Solatium kan inpek dan tur hi ka ngaihtuah a, a dik thei angem tih inzawhna ka nei a ni. Schedule Caste leh Schedule Tribe in 30% a reservation kan neihna lai kha kan thai bo a ang tlat a ni. Chuvangin, Schedule Caste leh Schedule Tribe in reservation kan neihna lai te, hetah section 41, new acts 15-ah khan Special Provision for Schedule Caste & Schedule Tribe, Pu Dy. Speaker, i phalnain, "as far as possible now acquisition on land shall be made in the Scheduled areas" tih a ni a. Tin, section 42-ah khan reservation

and other benefits-ah khan “all benefits including the reservation benefits available to the Schedule Tribe and Schedule Caste in affected areas shall continue in the re-settlement area, wherever the affected family’s belongings into the Schedule Tribe were residing in the scheduled areas referred in the fifth schedule of the tribal areas referred to in the sixth schedule to the Constitution re-located outside those areas. Then all the statutory safeguard entitlement & benefits being enjoyed by them under this Act shall be extended to the area, which they are resettled regardless of whether the resettlement area is scheduled area, referred to the said fifth schedule of tribal area in the said sixth schedule or not” a ti leh ta a.

Chuvang chuan helaia solatium 30% kan zuk tih mai kha miretheite rahbehna a ni zawk mai lo ang maw tih te min ngaituah tir a. Chuvang chuan hemi bill rawn puluttu kan Minister zahawm tak hian hei hi ngaituah that leh atan tuna ti thut thut lova, ngaituah that ve leh deuh atan min siamsak thei ta se.

Lehlah-ah chuan hetah ordinance a rawn luh dan pawh kha chuti lutukin hre lo kan ni lova, kan hre ve tho a, inngaihnamna keini lam pawhin sang tak kan nei ve tho va. Keini lam request-na hi ngaihnamna sang tak nen min pawm sak ve sela tha ka ti hle. Ordinance hi hmanhmawh taka tih chuk chuk a ngaihna lai kha a rawn sawi a, chutih lai chuan ‘High Court khan min rawn tur deuh chhen mai a’, a ti a, tur deuh chhen tih chuan vawikhat chauh a nilo tihna a ni. Session hmasa-ah te pawh khan Bill hi putluh theih, ordinance te pawh kha rawn tur deuh chhen a nih chuan engatinge nikum lam atangte pawh khan he hmalakna hi a lo siam loh? Chutiang kara, a tawpkhawk a hmanhmawh chuk chuk a han tih leh si hi member te palzutna deuh hlek awm anga lang lai te pawh kan hrethiam viau a. Chuvang chuan min hrethiam ve ta se, hei hi ngaituah thatah dah ila a van tha dawn em tih kha Pu Dy. Speaker, ka rawtna a ni e.

**DEPUTY SPEAKER** : Er. Lalrinawma.

**Er. LALRINAWMA** : Pu Deputy Speaker, ka lawm e. Hetilalah sawihona hun te kan nei a. Lehlamah helaiah ram chungchang Assembly-ah kan han khel te hi keipawh a lawmawm hlein ka hria a. Tin, ka hriatsual loh chuan kan Peace Accord, Remna leh Muanna kan lo neih a kan lo ziah dung thul te pawhin kan kal niin ka hria a. Remna leh Muanna hlu tak mai kan neih theihna atana lo thawktu zawng zawngte pawh vawiinah hian chibai ka'n buk leh a ni tih kha a hmasain ka'n sawi duh a.

Kan han sawi hrim hrim hi a lawmawm ka ti a. Amaherawhchu, thil tam tak a Dan hi azawngaza chuan kan zir chiang hleitheh lova. Amaherawhchu, keimah hian ka hmaa MLA zahawm tak sawi ang deuh khan hmin lutuk lohna ka nei a. A tlangpui ka'n sawi deuh zawr zawr mai ang a.

A hmasaberin section 7-naa Social Impact Assessment Report by Expert Group chungchangah hian; Expert Group-a two social scientist han tih kha, social scientist kan la neih awm hi ka la hre chiah lova. Chungte pawh chu kan rilruah hian awm se, khatiang Committee tak tak din tur kha chuan a buaithlak awm mang e ka ti deuh a.

Tin, Section 30-naah khan Award of Solatium tih kha keipawh 30% hi Pu Dy. Speaker, i phalnain – “The Collector having determined the total compensation to be paid, may, to arrive at the final award, impose “Solatium” not exceeding 30% of the compensation amount”, a ti a. Hei hi hetia han chawhruah ringawt mai hi chu a ni thei dawn em ni? Kan ram neih dan te leh kan hlut dan te pawh a inchen lova. Entirnan, a then chu kan nu leh pa atanga kan ram neih hrang hrangte leh, khatiangte pawh kha hlutna a inchen ta lo a ni. A then chuan ram tam tak te pawh kan lo nei thei a, hei chu la se a pawilo tih te pawh a awm



theih laiin a then te chuan kan pi leh pute atanga kan rochun, kan hlut ngawih ngawih, ‘ka pu min rochun, ka pa min rochun’, te pawh a ni thei ta a ni. Chutih laiin pakhat erawh chuan, ‘hei chu hmanni lawka ka lei a ni’ an ti thei bawh a. Chuvangin helaia 30% atana an hrut rual tawp mai lai hi chu pawm harsa ka ti a. Chuvangin kha ram hlut dan kha a ram neitute thinlungah a inchen lo zung mai dawn a ni. A thenin an lei, a thenin an rochun, a thenin an eizawna ngawih ngawih te a lo nih dawn si avangin, helai han hrut rual lai hi chu a rem chiahin ka hre lova, chuvangin, pawm a harsa a ni tih kha vawiinah hian ka sawi duh a.

Tin, section 40-na hi han keu leh ila, “special power in case of urgency to acquire land in a certain case” tiin section a rawn ziak a. Khatah khan section 40-na sub-section 2-ah khan darkar 48 chhungin chutiang/khatiingin an ti tur a ni tih kha a awm leh ta bawh a. Tin, kan zalenna tah hian min rapbet nasa viau lo maw le tih kha rilruah a awm a. Tin, darkar 48 chhung hi chuan in te chu kan hmu hman dawn em ni? Chhuahtsan ngai ta ila, a rei lo lutuk a. Chuvang chuan, mipuite tan pawh a him lo thei mai awm mang e tih kha ka rilruah hian a awm bawh a.

Tin, section 3-ah hian tihian a rawn ziak bawh a, “tender payment hi compensation atana 80%-a pe tur a ni” tih kha a rawn ziak a. Amaherawhchu, helai section 30-ah hian solatium chu compensation amount atanga 30% a ni tur a ni a ti bawh si a. Helai hi thu inkalh tak a ni bawkin a lang.

Section 40 sub-section 3 leh Section 30 sub section1 hi thil inkawlkalh niin a lang bawh a. Chuvang chuan, hengte pawh hi ennawn leh rih a va tha em tih kha rilruah hian a awm a ni. Chuvangin helaia solatium pek dan tur, kan pawisa dawn dan tur lai a sawi pawh hi thil inhmulo niin a lang deuh tlat bawh a ni.

Tin, section 43-na a “Rehabilitation and Resettlement Committee at project level” a tih kha en leh ta ila, section 1-ah khan Pu Dy. Speaker i phalnain “The

government shall constitute under the chairmanship of Collector to be called the Rehabilitation and Resettlement Committee”, a ti a. Sub-section 2-ah hian a member tur hrang hrang kha an tel ta a. Tichuan, helaia sub-section 1-a arawn ziah ang hian Pu Dy. Speaker, i phalnain “where land proposed to be acquired is equal to or more than one hundred acres” a ti ta a ni. Hei hi a zau rem rem khawp mai a. Ka’n chhut chhin a hemi ram zau zawng hi 1 acre-ah hian 43560 sq.ft. a awm a. Za a nih chuan sq ft. 43,56,000 (nuai 43.56) biala zau a lo ni dawn a ni. Chu chu a square anga kan teh kual dawn a nih chuan 2087 ft. bial a lo ni leh a, a meter-a kan dah dawn chuan 632 mt. a lo ni ta a, chu chu ½ km chanve aia zau hret bial a nih chu. Chu chu kan ram angah chuan sub village kan ngah bawk si a.

Kan bial angah chuan entirnan, Vanchengte te khu sawi ta ila, Vanchengte te chu khaw upa, hlaah pawh ‘Buan hmun pai ang pawm tawh hnu, Chengte-ah lam ang let e Lalpuithanglema’ tih ve na khua tawh kha a lo ni a. Khatiang hun rei tak an lo chenna ang te pawh kha km chanve bial hi a tling lo reng reng a ni, in 26 emaw chauh an lo ni a. Chung te chu heng committee-ah hian an tel pha ve reng reng lo tihna ang a lo ni ta a ni. Chutiang a nih chuan khatiang ang sub-village tam tak; tin, VC kan han pek te pawh khaw te tak te te pawh an awm ve ang tih a rinawm a. Chuvangin khatiang ang committee-a tel pha lo an khua leh tui an lo hmangaih ve ngawih ngawih te ngaihtuah tur pawh han tel thei lo tur kha chu Pu Deputy Speaker, an ngaihtuahawmin ka hria a, heng number te pawh hi a lian zau lutuk a. Chuvang chuan keini ram thingtlang khaw te te inbawk khawm, sub-village te, khatiang te te han awmkhawm tan leh khaw inbawk fir fer tan hi chuan kan bial theuh te pawh kha ngaihtuah ta ila, tel pha lo tur kan tam ang tih hi ka ring tlat a. Chuvang chuan heng lai te pawh hi a himdam lovin ka hria a.

Tin, Section 101-na kha en leh ta ila. Helaiah pawh hian Council of Minister thu leh hla mai tur ang deuh khan an ziak a. A that viau rualin hengte

pawh hi Dan puitling te a lo nih avangin thil tam tak hi ngaihtuah tur a awmin ka hria a. Chuvang chuan Pu Deputy Speaker, kan Dan-ah hian thil zir chian tur hi a la tamin ka hria a. Engpawhnise, a rawn puluttu Minister hi a zahawm viau nain, Select Committee, MLA te telna, khang hovin an ngaihtuah atan emaw zir chian that leh atana dah a hnuhkir mai hi a tha lo maw tih kha Pu Deputy Speaker, ka'n sawi duh a ni e. Chu chu ka sawi theih ni teh se, ka lawm e.

**DEPUTY SPEAKER** : Pu R. Vanlalvena

**Pu R. VANLALVENA** : Pu Deputy Speaker, ka lawm e. Hei Dan pawimawh tak mai kan hriat theuh angin kan Minister zahawm takin a rawn siam a, a lawmawm khawp mai a. Kan Minister hian a rilru a pe nasa tih a chiang a. Tin, helai kher lovah pawh Higher lama a rilru a pek zia te kan hria a, a fakawmin a lawmawm ka ti khawp mai a. Amaherawhchu, keini ho hi inlungrual tak thin kan ni a, hetia tlema engemaw enchian ngai deuh te han en neuh neuh a tul takah hi chuan a committee te inruat a enthat leh mai hi a tha em aw ka ti a, chu chu ka rawn rawt duh a. Kan Minister zahawm tak hian min han ruat ta se emaw Pu Deputy Speaker, nangma kaihhruaina pawn. Session leh huna chiang deuh hleka tih turin a committee ten lo zir lawk ta se tih kha ka rawn support a ni e, ka lawm e.

**DEPUTY SPEAKER** : Pu R. Romawia.

**Pu R. ROMAWIA, MINISTER** : Rin ai khan in lo zir lo hle mai a ni tih a lang a. Tin, Land Acquisition chungchangah hian interest pawh in lo la vak lo a ni tih te a hriat hlein ka hria. Chutiang a nih chuan ennawn leh thin pawh ni ila a ngai bawk kha kan inhniaalna tur chu a ni a.

1894 Dan kan hmang thei tawh lova, India pumpui Danin min rawn khuh hlawk tawh a, January ni 1.2014-a hman tan tura tih a ni tawh a. Chuti chung chuan kan hmang lo a, legal vacuum lian pui a awm tawh avangin High Court-in min vau tawh a. Chutiang avanga ordinance te pawh chu han tih loh theih loh kha a nih tak te kan sawi vek tawhin ka hria a ka move-naah khan.

Tin, ordinance hi a rei berah thla 6 a dam a. Tin, Session a kaltlang tawh ngat phei chuan chawlhkar 6 a dam chauh a ni. Chuvangin Session-ah ordinance kan pharh tawh a, kha ordinance kha chawlhkar ruk House hian kan pawm lo a nih pawhin House kan thut tlat tawh avangin kan pawm theih loh chuan chawlhkar ruk, May thla tirah a tawp dawn a, Dan nei lo kan ni dawn ta a. Dan kan neih loh chuan India ram pumpui huapa Dan siam ni 1.1.2014-a hman tur an tih kha kan hman ngei a tul maithei a. Chutiang situation-ah chuan kan ding a, rin aiin thu han tih a har khawp a. Amaherawhchu, kan member te an hmin ngang lova, solatium pawh 200 % te pawh a then chuan tam lo kan la ti hle a, 30% te chu tlem kan la tih hle lai khan sorkarin ram a la dawn a, in zawrh huam huam, ka ram la rawh u ti a in zawrh huam huam lai karah hian 100% te hi ti ila chuan kan sorkar hian pakhatmah kan lal chhung hian ram kan la lovang tih te hi chu thil chiang a niin ka hria a. Tin, chutianga khuti lamin central Dan kha min barh luh phei chuan tuna kan han tan chhan hram hram 371 G kha min thah sak leh dawn a nih chuan keini House-a thute hi chu mipuiin min dem viau ang tih ka ring a.

Engpawhnisela, Pu Dy. Speaker, ka rawn din chhan chu kan thu kha a awlai lova, a khirh viau reng a ni. Thil khirh tak a ni a, chuvang chuan tunah hian chawlh min pe ta mai la, kan han sawi khawm nak nak ang a, hetia House-a kan aw record ang lo hian, tah chuan dar 2:00 hnu lama min koh khawm leh hnuah khan a tihdan tur khan ber kha Minister-in rawtna ka siam theih mai ka ring a, chu chu min phalsak la tih ka rawn dil deuh ber che a ni mai.

**DEPUTY SPEAKER** : Ngawi rawh, member pahnih khat vel kha chuan an duh khawp lohna lai kha chu an sawi ve tur pawh a ni a. Lehlamah a tha e tia support duak duak kha opposition te hna pawh kha a ni bik lova, sawisel lai tur pawh kha an zawng ve bawk tur a ni a. Member tam zawkin an sawi a khata tang khan kan la buk dawn a ni a. Chuvangin Minister zahawm takin a rawn sawi ang khan keimahni puala Dan nei theia kan awmnaah hi chuan helaia rem leh rem lova Central Act kan lo adopt-a remchang lo deuh hi, heng compensation chungchangah te pawh engvangin nge mi Court-a an kal an kal kan tih chuan Dan kan neih mumal loh vang a ni mai a. Court-a kal ngai lo khawp Dan tha hi kan ram milin nei ila, chumi tur chuan an rawn buatsaih a ni a.

‘A tlai, tuna hnawh sarum’, han tih te kha Dan siam hi tih namai a ni lova, 2014 atangin siam a ngai a ni chauh a, a hmain Dan kan nei sa a, hetah U.T. lai, District Council lai atanga kan lo hman chhoh tawh Land Acquisition Act kan lo nei a. Mahse Central-in 2013-ah Dan thar a siam avangin kha kha kan adopt dawn nge keimahniin Dan kan siam ve thei reng a. Constitution provision-ah Dan kan siam thei a 371G hnuaiah, keimahni milin lo siam ve ila tih kha a ni.

Tuna ka veilama han hlauthawng te hlauthawn pawh kha whole of Mizoram tih kha nakinah Minister chuan ala sawifiah tho ang a, 6<sup>th</sup> Schedule para 3 hnuaiah khan chiang takin proviso a awm a, tahchuan Compulsory Acquisition of Land bikah chuan Council-in engmah prevention a siam thei lo a ni tih kha, state-in Dan hmanga Compulsory Acquisition of Land-ah chuan chiang takin para 3 hnuaiah khan a inziak a.

Tin, solatium a tlem lutuk han tih te pawh kha a ram a hlut chuan a compensate a tam ang a, kha a compensate a tam chuan 30% pawh kha a tam ve dawn a ni, ram hlu lo kha chu compensate pawh a tlem ang a, 30% pawh a

tle m ang a. Chuvangin, tuna kan Minister zahawm takin a sawi ang khan eng chen pawh zirna hun inpe ila kan lo inthlahdah leh ang a, Session hma daihin he Bill hi kan hmu tawh a, zirna hun chu a awm a ni. Chuvang chuan a rawn lut tawh a, (Pu LALRUATKIMA : Pu Dy. Speaker, Session hma daihin kan hmu lova, he Bill hi ni 18-a issue a ni a, session tan vek tawh hnuin, kar khat vel chauh hun kan nei a ni) Ordinance kha a awm a, ordinance tihdanglamna kha a tam lova maw. Engpawhnise, kan sawiho ang a, tichuan House-ah vote lak tur a ni dawn a, heng bill angah hi chuan. Chuvangin pahnih/khatin sawisel tlem a zawng an neih vang mai kha chuan titawp rihlo ila a tha awm e. Tunge han sawi leh ang.

**Pu K. SANGTHUAMA :** Pu Deputy Speaker, a bill hi kan duhlo a ni hauh lova, neih ngei ngei tur a ni a, a tha a. Amaherawhchu, han siamrem hret hret turte a la awm a kan hriat vang a ni a.

**DEPUTY SPEAKER :** Chung chu in rawn sawi chhuak a, a lawmawm a. Minister-in a remtih chuan

**Pu K. SANGTHUAMA :** Khang kha a nih avang khan vote lak pui puia tih chuan kan in vote hneh ang tih pheih chu a Chiang a. Amaherawhchu, ram tana tha lo tura vote lak ringawt loh pawha siamthat theih a ni lawm ni kan tihna a ni zawk a, chutiang zawng chuan kal ila a tha ang.

**DEPUTY SPEAKER :** Chu tho chu a nia ka sawi, in ngaimawh lai kha in sawi chhuak a la ni chauh a, engemaw diklo deuh ni a in hriat lai kha. Chung chu an la rawn sawifiah ang a, tin, member dang pawhin an la rawn sawi dawn a, khang kha kan nghak tur a ni. Pu Zothangliana

**Pu H. ZOTHANGLIANA:** Pu Deputy Speaker, ka lawm e. Dan siam hi, Dan thiam i ni a, Pu Deputy Speaker, nangmah hi, a harsat dan, thil awlai a nih

loh dan hrechiang ber pawh i ni tih ka hria a. Nichina kan Minister zahawm takin a move laia a sawifiah ang khan 1894 Dan, Land Acquisition Dan kha central sorkarin Dan thar a siam takah chuan a hman theih tawh si lova, a thi si a, chulai karah chuan keinin central sorkar Dan thar hi han adopt ve ngawt dawn ila kan state a pachhe si a, kan zolo nasa a ni tih a chiang reng mai si a. Chuvangin, kan hotuten engtinng e kan tih ang tiin ngaihtuahna an seng zung zung a, rem an ruat a, mithiamte nen inrawn khawmin drafting committee-te siam chi a ni ngem, tih atanga ngaihtuahna seng chhovin, “a ni dawn e”, an ti a, tichuan drafting committee an han buatsaih a. Kan A.G lam, Dan thiam lamte rawnin central sorkara Dan thiamte thlengin an ngaihdante zuk la hmasa te te in, Article 371(G) hnuaiiah hian hetiang Dan hranpa siam ve tur hian thuneihna kan nei tawk em, kan him em, siam ve mai hi kan tih tur a ni dawn lawm ni tih zawng zawngte, thuhmahruai tam tak mai kha Dan draft a nih hma khan buaipui a ni phawt a ni tih te kha ka hriat ve nial nual avangin ka’n sawi hmasa duh a.

Tichuan, kan rama mithiam leh rintlak ber bera ngaih kan IAS retired te, MCS retired leh thawk mekte leh Law lama kan mithiamte, kiltin mai ami, Mizoram Bar Council Association tih emaw ni an hming ka lamsual palh chuan min lo ngaithiam sela, Dan thiam pawl ho lamte zawng zawng pawh telin drafting committee siam a ni a. Chuta tang chuan uluk taka zirin an bei chhova, hun reitak chhung, a kum tel tehmeuh mai a ni tain ka hria, an buaipui a ngai a. Chutiang chuan nasa taka buaipui a nih hnu leh kan sawi tak ang khan land acquisition chungchangah thil hmanhmawh thlak tam tak a awm baw k si avangin, central sorkar lam atangte pawhin nawrna, turna te pawh a lo awm ve baw k zel nen “Ordinance” te pawh kha loh theih loh, mamawhna avangin drafting committee-in tha tawka a hriat vele h tihchhuah a lo ni ta a. Kha kha session neih nen a innang remchang a nih si loh avanga loh theih lohna, tulna avanga ordinance kha kan hotuten tichhuak an ni tih kha ka’n sawi nawn ve leh hrim hrim duh a.

Tin, Land Acquisition chungchang, Land leh Revenue chungchang hi chu a bung leh a changte hi uluk taka zir a, bih chet chet a nih loh chuan a inkalh leh inkalhlo lai pawh hi hriatthiam a har khawp mai a, keini ang 'layman' tan phei chuan a harsa em em mai a. Nichina kan ngaihthlak tak ang khan keini a hminga MLA rualte hi Dan thiam leh khalama degree nei emaw, thiamna hranpa nei lem lo te a tam ber hi chu kan ni tlang a. Chung karah chuan chhiar uluk lo leh nasa taka ngaihtuahna seng hmasa lemlo chuan, han keu thuk thuk ringawt hi chuan a inkalh lemlo lai te pawh hi inkalh anga hmuhte pawh kha a awl viau ang tih te a rinawmin ka hria a.

Entirnan, nichin khan member zahawm tak pakhat khan a ward of solatium chungchanga not exceeding 30% section 30-a lo lang leh, section 40-a sub-section (3)-a 'the collector shall tender payment of 80% of the compensation for such land as may be estimated by him, to the person interested/entitled there to' tih te kha inkalh ang deuh khan a hria niawm tak khan a rawn sawi ri a. Amaherawhchu, amah ngei pawh khan Pu Deputy Speaker, han chhiar chiang lehzual ta sela chuan, kha kha thil inkalh a ni lem lo a ni tih a hmuh tho tho ka ring. Chutiang chuan a provision hrang hrangte hi mithiam ten uluk takin rei tak mai an chai a, Dan dinglai, chulai ami Dan nen chuan a inkalh em, kalh lo em tih zawng zawngte nena an ngaihtuah vek hnu a hetiang a uluk theihtawpa an rawn draft chhuah hi a ni a.

Tin, solatium 30% tih chungchang hi han sawi nawn ve leh lawk ta ila, section 30-ah khan a lang a, sub-section 1-ah ziahlan a ni a. Tichuan, a dawt chiahaah khan explanation pawh kha chiang takin a bu-ah khan a inziak nghal nghe nghe a. Mizoram bikah hi chuan tun thlenga kan kalphungah hian kan ram inpek dan hi a thlawn liau liau tluk deuhthawa inpe hi kan ni a. Vairam kalphungte nen chuan kan House Leader zahawm tak Pu Lal Thanhawla, kan Chief Minister



zahawm tak ni bawkin a sawi zauh zauh tawh thin ang khan, kan rama ram kan inpek dan te hi chu a inanglo em em mai a ni.

**DEPUTY SPEAKER** : Ngawi rawh aw, dar 1 a ri a, sawi zawh tir mai ang u aw.

**Pu H. ZOTHANGLIANA** : Ka sawi zo tep, Pu Deputy Speaker. Ka din kha a tlai laklawh deuh bawka, ka lawme. Phairamah chuan, hmundangah te chuan compensation dawng tura an ram sorkarin emaw a chhuhsak hi an hlau em em a, thih hreh takin an hreh a.

Hmannia kan hon'ble Minister Pu R. Romawia'n jail tang thenkhat chungchang a sawi a, "ka pa fa ka nilo em ni", a ti mai a ni, a tih ang kha a ni. An ram, pi leh pu atanga an neihchhun tak takte, an inngahna, an ei hmuhna awmchhun han chhuhsak kha chu an phallo nasa mai a. Dan bawhchhiaa mi nunna hial lak phah nan pawh mi tam takin an hmang a ni a tih te leh, keini Mizoram condition hi chu a inanglo hle tih kan hria, zep lovah chuan tun thleng hi chuan, a zawng zawng chuan kan tingam hauh lova, a tam zawkah hi chuan kan ram hi compensation hmuh nan kan phal a, kan duh em em mai a, kan ram hi eng kawngin emaw hrut ve hram sela, compensation dawng ve ila, tih hi kan duhthusam, a chuh in kan inchuh emaw ni tih turin kan awm zawk mah a.

Chutiang chu kan awm dan, kan dinhmun a nih avangin central sorkarin solatium te pawh hi 100% a ni tawh tur a ni a tih te hi keini state pachhia, intodelhlo tak mai tan chuan zuam ve rual a nih loh avang leh Pu Deputy Speaker, nangmah ngei pawhin i han comment zawk ang khan a a compensation amount a san chuan 30% of the compensation pawh kha a sang dawn a, a inawm tawk tihna a ni mai a. A compensation amount kha sang tur a nih lem loh a, a

tekhawng hrang hranga collector te leh a committee concern te, social impact assessment tih vel zawng zawng, factor hrang hrang thlir a compensation tam pek lohna tur deuh zawk a ni e han tih ang chiah kha chuan 30% pawh kha alo tlem ve leh deuh dawn tihna a ni mai a tih zawng zawng te han ngaihtuah khan hun hi tlemin han inpe leh deuh dawn pawh ni ila; keini aia mithiam leh chinchang hria, a taka experience tam tak lo nei tawh te leh kiltina mi Law lama mi te, Ukil lam mi te zawng zawng pawhin uluk taka an lo thlir tawh, a tha tawh e an tih ang aia tha leh zual zawk hi chuan tun leh tun maiah hian a hmanhmawh thlak bawh si avangin han tihchhuah dan tur hi a awm chuangin kei chuan ka hre lova.

Chuvang chuan, Pu Dy.Speaker, helaia nichina kan member thenkhat ten 2<sup>nd</sup> schedule-a subsistence grant thlakhat atan ₹ 3000/- zel han tih te hi chu a tlem lutuk deuh a ni, an tih te hi a tlem thei a, a tlem lo pawh a ni mai thei. Amaerawhchu, hemi a “schedule” ho phei hi chu Council of Ministers-in tul leh tha an tih ang a an amend theih, an siamthat mai theih a ni a. Thil harsa pawh a ni lova, House-a ngaihtuah leh kher kher tur chi pawh hi a ni chuang hauh lo mai a. Chuvangin, kan sawiselna lai, kan han kalhna lai te te kha thil tam pawh niin a lang lova. Sawisel ve hrim hrim ang aw ‘to criticize for the sake of criticism’ tih ang deuh te pawh khan ngaih theih ve tho a ni em aw ka lo ti deuh va. Chutiang chu a nih avangin Pu Dy.Speaker, he bill tha tak mai hi kan ramin hmanhmawh taka dan a siam a ni a. Hman mamawh tak mai a nih ang tak hian pass ngei ni zawk rawh se tiin ka rawn support ve a ni e. Ka lawm e.

**DEPUTY SPEAKER** : Awle, kan chawl rih ang a, dar 2-ah kan thukhawm leh dawn nia.

**2 : 00 P.M.**

**DEPUTY SPEAKER** : Kan bill sawiho kha chawhma lamin member parukin an sawi hman a.

**Pu R. ROMAWIA, MINISTER** : Pu Deputy Speaker, thil kan han sawi hova, kan rama nghawng thui tak nei thei te pawh a ni a, he kan Dan hi mitin min khawih thei Dan a ni a, a pawimawh hle mai a. Kan member-te khan hun te pawh nei tawk lo an inti a, thil thui tak zir tur pawhin. Minister ka nihna anga ka'n ngaihtuah khan keini a drafting lam khan hun kan hmang tam em em a. Anni khan hun kha an hmang tam lo em em a, uluk zawka kan member-ten an thlir theih nan kan Dan buin min phalsak ang hian "The Mizoram (Land Acquisition, Rehabilitation and Resettlement) Bill 2016" hi Select Committee a dah min phal sak turin ka rawn ngen che a ni.

**DEPUTY SPEAKER** : Minister-in sawi zui lova Select Committee a tih a ti a, kan remti mai em? A nih chuan Chairman tur leh member tur te kha Minister khan han rawt sela.

**Pu R. ROMAWIA, MINISTER:** Pu Deputy Speaker, kan Danin a sawi ang khan chairman tur kha chu Minister in-charge ni mai awm tak a ni a. Member atan chuan hengte hi an ni:-

- 1) Pu P.C.Zoram Sangliana
- 2) Pu John Siamkunga
- 3) Pu T.Sangkunga
- 4) Pu Vanlalzawma
- 5) Pu R.Vanlalvena

Hengte hi House-in min remtihpui theih chuan ka rawn rawt a ni e.

**DEPUTY SPEAKER** : Kan pawm mai em, chu chu tel ve se tih kan nei em?

**Pu LALRUATKIMA** : Pu Deputy Speaker, pakhat chauh. I vei lama mi hi kan tel a tu emaw chu, sawi khawmna hun kha min pe thei lawm ni. Pakhat te chu tel belh dan a awm lawm ni.

**Pu R. ROMAWIA, MINISTER** : A number lam hi kan Dan-ah hian sawi chiah a awm lova, kan member-in a rawn sawi kha chu harsatna a awm lo turah ka ngai a ni. Nangmahni khan rawn sawi nghal mai teh u a.

**DEPUTY SPEAKER** : Dr. K. Beichhua telh belh a ni. Tichuan Select Committee kha engtinnge an ngaihtuah hun chhung tur kan bithliah dawn em?

**Pu R. ROMAWIA, MINISTER** : Pu Deputy Speaker, hei hi dan hmanhmawh thlak deuh mai a ni a, chuvanga ordinance te pawh han tih ruai ruai tawh a ni a. Ordinance kha House-ah kan pharh tawh a, a nihna ang anga bill-a kan siam thei lo a nih chuan a thi a ni chawpchilh mai si a. Chuvangin Dan nei lova han inkhai rei tur kha a tha lovang a, a rei berah thlakhat te chu ni thei se a va tha ve.

**DEPUTY SPEAKER** : A nih chuan thla khat chhunga report turin Select Committee kan din a, member-te kha kan sawilan te kha an ni a, Minister in-charge kha chairman a ni a.

**Pu VANLALZAWMA** : Pu Deputy Speaker, khami Committee-ah khan ka hming a lo lang ni awm a nia, ka hman lo em mai Pu Ruatkima i ti zawk teh ang. Min hre thiam mai teh u.

**DEPUTY SPEAKER** : Awle, Pu Lalruatkima kan ruat mai ang. A nih chuan kan bill sawiho “The Mizoram (Land Acquisition, Rehabilitation and Resettlement) Bill 2016” chu House-in Select Committee-ah kan hlan a, chu

chuan thla khat chhungin report theh lut tura beisei an ni a, chairman leh member te kan ruat fel a.

Tichuan a dangah kan kal ang a, “The Indian Stamp (Mizoram Amendment) Bill 2016” House-a introduce turin Minister zahawm tak Pu R.Romawia i lo sawm ang.

**Pu R. ROMAWIA, MINISTER** : Pu Deputy Speaker, “The Indian Stamp Mizoram Amendment Bill 2016” hi House-ah introduce ka rawn dil e.

**DEPUTY SPEAKER** : Introduce kan phal em? aw kan phal a. Introduce pahin ngaihtuah turin han dil nghal sela.

**Pu R. ROMAWIA, MINISTER** : Pu Deputy Speaker, Mizoram-ah hian Indian Stamp Act hi kan hmanna a la rei lova, 1995 atang khan kan han hmang a. A bik takin chhiah lak tihpunna atan hian a tangkai khawp a, mipui tan a rip si lo mahse him zawk si, an document pawh vawnhim sakna tur a ni a. Ama’rawhchu, heti laia thil kan han tih hian, kan ramah kan hre theuh va House-ah member-te pawhin in ngaimawh thin a, in hmun lo ram emaw khang ang chi reng rengah te pawh a hlutna min han tihsakna tur Central Valuation Committee tih angreng te kha kan lo nei lova. Revenue Department hian keimahniin grade kan siam dan azir hian hmun hi kan han then ve a, group 1,2,3,4,5,6,7 khatiang thleng khan kan han ti a. Chutih laiah per square meter-ah heti lai hi chu a ram hlut dan a ni e tiin land valuation kha kan han tuk ve thin a ni a.

Ama’rawhchu, Stamp Act atanga chhiah kan pekna tur te nen pawha Dan kan neih, India ram in Dan a hman pumpui kha keini chuan kan hmang ve lova, engemaw chenah khan tihdanglam khan kan hmang a ni a. Chutiang chuan

2016-a Indian Stamp Act amendment pawh hi chutiang atan chuan kan rawn intilut a ni a.

Tichuan section thar hawn kha kan rawn dil ta a, chutah chuan “instrument of convenience under value how to be deal with” tih a ni a. Miin document register tura deed a siam tirin stamp duty chawi tlem a duh avangin ram inleina dah khamna etc. hlut zawng emaw a in leh lo hlut zawng dik tak an tarlang thin lo fo va, chutiang huna tih dan tur chu state tam zawkin anmahni Stamp Act-ah emaw India Stamp Act 1995 Amendment siam a an lo khungluh tawh angin hei hi dah luh ve a ngai a ni. Chuvangin section 47(B)-ah hian Constitution of Central Valuation Committee hi dah belh ni sela tih a ni a.

Tin, a pathumna-ah chuan Schedule-a lo lang Article 5(e) leh Article 5(g) te hi paih a, hei hi a dang hian a take care of tho avang khan hei hi a ngai hran lo a ngaihan a ni a.

Tin, Article 23(a), 23(b), 23(c), 23(d) te hi siamthat a ni a, a hma khan engemaw percent tuk diat diat kha a hran hran a awm a. Department lamah te kan han ngaihtuah khan sawrkar leh mipuite hmasawna tura sumtuakna tha a ni a, hetilaia registration titute tana rip baw k silo kha, chu chu Finance Department te pawhin thurawn min han pe a. Chuvangin market value 2% hian hengte pawh hi tih ni sela kan ti a, thenawm state te phei chuan hetah hian 5% lai an lakna a ni a. Chu chu helai kan rawn sem tawh ang khan a ni a, a sentence a sei hlawm khawp mai a kan Dan bu kha, sentence sei pui pui mai kha a ni a. Mahse hengah hian a interest awm theih dan tur te, ni 90 chhunga tih tur te, khanga an percent pek dan tur te kha a ni a. 47(A)-ah chuan khang lampang kha ‘instrument of conveyance undervalued how to be dealt with’ tih a ni a. Section 47(B)-ah erawh chuan ‘Constitution of valuation committee’ tih kha a lo ni a.

Chutiang chuan heng Dan hi kan Dan awm tawh sa ah hian han zehluh belh ila tih kha kanrawn rawt a ni a. Keini tih ang bawk hian state hrang hrang Maharashtra te, Gujarat, Karnataka, Kerala, Rajasthan te, chutiang te pawh chuan hetiang hian anmahni state-a hman tur ang khan he kan Dan chhah tak mai “The Indian Stamp Act, 1899’ pawh hi an lo pawt rem ve a. Keini pawhin hetiang hian pawt rem chho ve ila tih kanrawn ngen a ni ber e, Pu Speaker.

**SPEAKER :** Awle, kan Minister zahawm takin “The Indian Stamp (Mizoram Amendment) Bill, 2016” kha a introduce ta a. Tunah chuan House sawiho atan arawn move ta a, a copy pawh kha pek vek in ni a, a sawiho pawh kan tan thei tawh a, sawiho tan tawh ila. Tunge sawi hmasa ber ang? Pu Ruatkima

**Pu LALRUATKIMA :** Pu Speaker, tawitein, sawi tur tam pawh a awm lova. Ti kha chuan kan Minister zahawm takin Amendment Bill arawn putluh hi a pian a dik ta deuhin ka hria a. A hma khan hemi Stamp Act leh tuna Select Committee a kan Bill dah tak kha a inkaihnawih tlat mai a. Helaiiah hian Amendment Bill-ah hian Valuation Committee chungchang te kha arawn sawi tak avanga khami kan pian hmasak tir si kha chuan, tuna Stamp Act-a tih tur mawhphurhna hrang hrang Authority ten an mawhphurhna tur Market Value kha assess dan tur kha ka sawibelh zawk a ni a.

Hei “The Indian Stamp (Mizoram Amendment) Bill, 2016” ah hian Section 47(b) ah ‘Constitution of Valuation Committee’ han tihah hian member chungchangah hian engzatnge awm ang aw tih hi ka hrethiam chiah lova. Heta a sawidan chuan Chairman a awm tur thu leh Inspector General of Registration leh Commissioner of Stamps kha a ni a. Chuvang chuan eng ang chin nge ni ang, eng level nge Authority neih dan tur kha ka chiang chiah lova ni.

Tin, award an pek a lungawi lote tlanna tur kha mi pakhat chauh tur tih a ni a, duh ai chuan a tlem deuh lo maw tih kha ka ngaihtuahnaah chuan a awm a. Chuvang

chuan, authority a Presiding Officer hi a hnathawh fel leh fel lohah te khan thui tak a innghatin ka ring a. Chungte chu a tlangpuiah tawitein helai Amendment tul awm a an rawn tih te hi chu a tha khat viau chuan ka hria a, chu chu ka rawn tarlang zawk a ni e.

**SPEAKER** : Midang sawi tur kan awm tawh lo a nih chuan tuna an sawi chu Minister-in khaikhawm sela, a chhan ngai te lo chhang sela, Pass lo dil tawh mai sela sawi tur kan awm tawh loh chuan. Sawihona Pu Ruatkima chauhin a sawina kha a chhang a ni mai.

**Pu R. ROMAWIA, MINISTER** : Pu Speaker, a sawitu ber pawh khan against zawngin a sawi lova, hman tangkai a nih tur thu a rawn sawi a ni a. Hetah hian a Chairman kha Inspector of Registration and Commissioner of State rank kha a ni a, hei a thawh tur pawh a sawi vek a, estimation te, publication, revision of market value guideline te a lo ni a. Chuan a methodology te pawh kha sawi kim deuh vek a ni a.

Tunah hian hetilaia committee formation hi Rules lama la kal tur a ni a, helamah hi chuan khami kha a Chairman tur emaw kha han spell out mai kha a ni a, chungte chu a ni ber mai a. Engpawhnise, tunah pawh hian keimahni revenue lampang te han en chuan khutilaiah Stamp and Registration khu mi bungrua kha kan han register a, kan han stamp a, uluk takin khutilai ah kan han kawl a, security nei tha em emin. Amaherawchu, kan indaih lo hle a, mahse hetilai evaluation chungchangah hian Pu Speaker, han sawi thui deuh hlek ila.

Collector te kan han tihtir a, Aizawl DC te leh Lunglei DC te, Kolasib DC te emaw pawh anmahni rate te pawh a lo inang lova, inang hleitheh pawh a ni lo maithei a, khawpui laili leh rampalaileng te pawh. Chu chuan kan ramah hian khatiang deuh nuai khan kan awm avang khan Central Valuation Committee hi chu kan mamawh a. Khawi maw lai bikah te chuan a rate kha kan lo tihniamin kan lo tisang thei a.



Entirnan Bilkhawthlir chu Aizawl a hlat em mai ti ila zuk tihnam ringawt ila, khuti lam mi tan chuan a thinur thlak mai thei a, Champhai lam Aizawl khawpui a hlat em mai ti hniam ang ti ringawt ila. Khatiang te a nih avang khan rampum thlir tura mumal taka Evaluation Committee kan neih hi a tul tawh takmeuhin kan hria a. Heng anga tax kan lakna leh thil reng reng kan laknaah pawh khan chu chu hman tur a awm avangin he Dan hi kan han belh a ni, 47(A) leh 47(B) hi. Kan ram mamawh puhruk turin kan belh a, Pu Speaker, hei hi House-in lungual taka min pass sak turin ka rawn ngen e.

**SPEAKER :** Awle, kan Minister zahawm tak Pu R. Romawia'n "The Indian Stamp (Mizoram Amendment) Bill, 2016" chu pass a rawn dil a. Pass remti zawngin 'remti' ti rawh ule. Remti lo kan awm em? Awmla.

Tichuan, "The Indian Stamp (Mizoram Amendment) Bill, 2016" chu he House hian lungual takin a pass a ni tih ka puang e.

**Pu R. ROMAWIA, MINISTER :** Pu Speaker, ka lawm e.

**SPEAKER :** Tunah chuan Bill dang pakhat kan la nei a, chu chu "The Mizoram Lokayukta (Amendment) Bill, 2016" a ni a. A Bill neitu Minister zahawm tak Pu Lalsawta kan sawm anga, House-ah introduce rawn dil phawt se.

**Pu LALSAWTA, MINISTER :** Pu Speaker, Governor recommendation ang leh i phalna leh he House remtihain, 'The Mizoram Lokayukta Act (Amendment) Bill, 2016' hi he House zahawm taka introduce phalna ka rawn dil e.

**SPEAKER :** Awle, Minister zahawm takin phalna a rawn dil a, kan phal mai lawm ni, kan phal em? Aw a lawmawm e, kan phal ta a. Rawn introduce sela,

koh nawn leh ngai tawh lo turin House a sawiho nghal turin rawn move mai sela a awlsam zawngin.

**Pu LALSAWTA, MINISTER** : Pu Speaker, Mizoram Lokayukta Bill hi kum 2014 khan kan lo passed tawh a, hei hi kan ngaipawimawh em em a. A bik takin kan Chief Minister hi a ngaipawimawh bertu a ni a. He thil kan neih duhna hi hmanah hun rei tawh tak atangin a ni a, chu lam chu sawi thui vak pawh ngaiin ka hre lova.

Tichuan kan party pawhin kan Manifesto item pawimawh berte zing ami a ni nghe nghe a, churangchuan, tihmakmawhah kan ngai a. Hmanraw tha tak, corruption, eirukna, hlemhletna danchahna tha tak ni a kan hriat tlat avangin kan duh em em a. Chutichuan he Dan kan siam dawn hian central-ah India ramin Dan a neih ve thung tur, Lok Pal Bill hi an buaipui a, namenlovin Delhi-ah te pawh nasa taka public upheavals i ti mai ang, mipuiin an buaipui, kawng te pawh an zawh luih luihna tham kha a nih avangin keini hian tha kan lo ti ve a. Supreme Court pawh hian state zawng zawng hi nei turin min duh a. Mahse keini hi chu kan fimkhur khawp a, i ti mai ang, Pu Speaker, state dang zawng zawngina an Dan neih te, an harsatna tawh te, Lokayukta-a an history te kan thiam ang tawkin kan inzir a, kan document neih ang zawng zawng te nen. Chutichuan, Mizoram-ah pawh mahni mai pawh induhtawkw lovin pawnlam ami hemi engto tur anga kan hriat te, organization hrang hrang ami kan sawmin MZP te, PRISM te kan sawm khawm thin a, kan lungrual thei viau thin a.

Amaherawhchu, a thu hrim hrimin he hna hi a harsat avang hian a khel chhung te pawh hi a rei khawp a, ngaihdan an rawn neih belh leh thut chang te pawh hi a awm a. Chutiang reng reng chuan kan duh ang pawhin kan tirang hleithei lo kha a ni a. A tawp a tawpah chuan, “Hetiang hian a tha ang”

tiin he House zahawm takah hian kan rawn pulut ta a, Act pawh chu kan han nei ta a.

Chutihlai chuan Indian history-ah state thenkhat khatah harsatna an tawh te kan han hriat belh leh zel a, Karnataka phei chu India ramah hetiang lama a entawn tlak ber an ni lawm maw ni le, kan tih ngeiah pawh harsatna te an tawk a, political issue hraw fe fe an rawn pawchhuak nawlh nawlh mai a. Chutiang kara kan han zir kan han zir ve hian kan Dan pawh hi “Ennawn leh ngai deuh hlek chu a awm a nih hi,” kan ti a. Chuvangin vawiinah hian he House zahawm takah hian amendment item 11 hi siam a ngai a ni kan ti a. Chung item 11 kan siamna innghahna ber chu Lokayukta, a lam danah hian a then chuan Supreme Court-a kan Chief Justice pakhat chuan ‘Loka Yukta’ a ti a, keinin ‘Lokayukta’ kan ti a, a lam dan pawh hi kan hre chiah lova, Hindi thiam ho pawh kha an lam dan a inang chuang lova. Lokayukta tih hi kan hriat dan ber chu a ni a, mahse hre tur awm taka kan ngaih thenkhat kha chuan ‘Loka Yukta’ an ti tlat mai a. Engpawhnisela, keini chuan kan lam dan pangngaiin lam zel tho ilangin a thain ka ring a.

Tichuan a Chairman ber bakah khan kan Dan-ah khan member dang pahnih (2), a Chairman nen pathum (3) awm thei turin kan han ruahman kha a ni a. Mahse, 3 hi lo hmu remchang ta lo ila ‘vacuum’ te kha lo awm hlekin emaw a mihring hrim hrim pawh lo inhmu lovin pakhat chauh lo inhmu palh ta ila, chutiang hunah chuan hnathawk thei lova awm mai kha kan hmachhawn dawna hriatna kan nei a.

Chuvangin kan Dan-a kan lo neih tawh Lokayukta and ‘the Members’ tih awmna chi leh chumi kaihhnawih chi ‘words’ ang chi reng reng kha a vai hian member pakhat chauh, Chairman chauh a awm a ni emaw, member pakhat leh chairman pakhat chauh, pahnih an awm a ni emaw, Chairman

leh member pahnih dang, an vaiin pathum an awm a ni emaw, khami hrim hrim kha a khaikhawm nan Lokayukta tih hi hmang mai ila, Lokayukta and the members han tih hian kan Dan-a a chuan si kha chuan pakhat chauh a lo nih hunlai te ni ta se, kan duh reng vanga pakhat chauh kan neih lai te a lo nih palh khan, kan Dan hi a famkim taw love a kan ti a. Chutiang avang chuan kha lai kha kan han siam hlek hlek a.

Kan member ten kan Dan bu amendment kan siam tur hi in lo hmu tawh tho va. Pu Speaker, rem i tih chuan min lo enpui ta se. Statement of Objects and Reasons tia sei angreng deuh hlek, phok hnih chuang hret kan han zia kah kan amendment of section 3 kan ti a. Tuna ka han sawi chiah mai, chutiang khatiang chu Chairman-ah emaw member-ah emaw judicial member nilo tur an nih chuan tih lai tak mai kha, judicial member tur kha a hranpa taka kan tih a kan dah hran bik chuan tuna kan hlauh tak mai, Chairman chauh a awm lai si a judicial member awm lova Lokayukta hi Dan lova function in ni min tih palh kan hlauh avangin helai tak hi hetiang hian ti ila kan ti ta a ni.

Hemi lai hi ‘and or if appointed’ tih hi hemi section 3 karah khan ‘and’ tih aiah khan ‘and’ ringawt lo deuh hlek ‘or if appointed’ member te hi appoint tel an nih chuan tih lai tak kha siam danglam kan duh lai a ni a. Pu Speaker, chumi siam danglam kan duhna chhan chu ka sawi tawh ang khan, ‘and other members’ tih emaw a nih kha chuan member pakhat chauh, Chairman chauh te a nih lai khan an function thei lovang tih kan hlau baw si a, ‘if appointed’ tih hian a chhan zovin kan hria a. Chu chu pakhatna kan han tih duh lai chu a ni a.

Tin, a pahnihna-ah chuan hemi, ‘as a chairman or as member other than a judicial member if he is a person of impeccable integrity outstanding ability having special knowledge and expertise of not less than 20 years in the matter relating to anti-

corruption policy, public administration for 20 years in the matter relating to Anti-Corruption Policy, Public Administration, Vigilance, Finance including Insurance & Banking, Law & Management’, han tiha a thlang zel ami zawng zawng ang hi kan tihdanglam tha kan ti a. Chuti a nih loh chuan helaia Judicial member kha loh theih loh anga kan Danin a vuah tlat kha chuan khatiang tur kha Chairman-ah kan hmu a, amah chauha function theih te a nih loh si khan chuan duh vak lo chungin Judicial member ang kha lak belh leh hram te a tul ang tih kan hlauh avangin helai hi kan han tidanglam hret ta a.

Tichuan, Section 4-na ami kha, ‘the chairman/the chairperson and members,’ han tih lai kha nichina kan sawi tawh ang khan, ‘the Lokayukta’ han tih tawp mai khan pakhat a ni emaw, pathum a ni emaw, pahnih a nih emaw pawh khan a institution khan khai khawm vek mai se, ‘the Lokayukta’ tih khan keng mai se, tih kha kan Dan tinung thei tur leh a tak taka kan function theihna turah kan beisei a ni.

Tichuan, a phekk lehlam, ‘amendment of Section 5’ tihah khan, ‘appointment of Chairperson and members’ han tih lai takah khan tuna kan sawi ang khan, ‘The Lokayukta’ tih kha a ni a, ‘Appointment of Lokayukta’ tih kha a tawkk maiin kan hria a. Chutichuan, Section 5-na hi hetiang hian han thlak ta ila a tha ang e kan ti a.

Tin, khatia kan tih khan pakhat ngawr ngawr Pu Chairman, kan tinzawn lova, pathumte pawh kan nei ang a. Kan hmuh dan ang leh sawrkarin tha a tih ang zela kha kha chu kalpui tur a ni dawn a. Chuvang chuan, pakhat an nih pawha thawk thei, pathum an nih pawha thawk thei, pahnih an nih pawha thawk thei tura kan duh tlat avangin he Amendment hi siam a ni a. Chuta Section 5-na thlakna turah pawh hian hetiang hian kan ti a, ‘appointment of Chairperson and members Sub Section (1), the Governor shall take or cause to be taken all the necessary steps for the appointment of the new Chairperson and/or Members at least three months before the expiry of the terms

of such Chairperson or Members, if there are any Member or Members, as the case may be, in accordance with the procedure laid down under this Act' tih a ni phawt a.

Sub Section 2-ah khan, 'if the office of Chairperson falls vacant due to the reasons specified in Section 9, and there is no member to fill such vacancy in accordance with the provisions of the said section, the Governor may by notification, appoint a new Chairperson in accordance with the procedure laid down under this Act,' a ti a. Chairperson awm mek kha lo bang emaw, lo pension emaw, lo thi palh emaw a lo nih a, other member senior in an han luah mai tur te a lo awm remchan loh palh pawha Governor-in Chairperson a appoint mai dan tur kan siam loh chuan pakhat chauh kan neih hunlai te a lo nih palh takin ti a venthawn thilah kha kha kan dah a ni.

Tichuan khatah khan proviso a awm a, 'provided that the office of the Chairperson shall not be vacant for a period longer than one year comprising of 12 months from the date of such vacancy' kan ti a. Kum khat aia rei hmun luah lovin a awm tur a ni lo ti hian kan han thlak a. Hei pawh hi kan tih lai hian kan ngaihtuah ngun khawp a. Ni 365-ah ni 360 kha han awl ta se, Lok Ayukta neih a hun tawh si chuan a rei dawn vang vang mang e, kan ti a. Mahse, Dan dang te, mi Dante kan han thlir ve khan an lo tih ve deuh fur tho avangin hei hi chu a him tawk ang a, hemi chhung hi a hun chhung a ni mai a. "A tuk lawkah pawh tih leh theih nghal tho a ni alawm mawle", kan ti a.

Tichuan 5-na kha, Amendment of Section 6, hetah hian, 'the Chairperson and every member' han tih hi nichina ka sawi tawh ang khan Dan pawna a awm reng chuan khalai kha a fel dawn lova, 'the Lokayukta' tih khan khaikhawm thap mai sela. Pakhat a ni emaw, pathum a ni emaw, pahnih a ni emaw pawh ni sela, a fel ta ber ang e tiin amendment hi kan han rawt a.

Tin, parukna-ah chuan, ‘Amendment of Section 7’-ah hian pakhat aia an tam khan, tam ngei ngei tur tih a ni lo, an lo tam palh pawha ‘if appointed’ tih leh a hnu deuhhleka lo lang leh ‘if any’ tih kan telh loh chuan a fel lo palh thei ang tih hlauhna kan nei a. Chuvang chuan an awm ngei ngei tur a ni tihna ni lovin, an awm pawhin, an awm chuan tih provision hi kan dah tel a ngai a ni, tiin kha lai kha amendment tulin kan hria a.

A pasarihna-ah chuan, ‘amendment of Section 8’ tihah hian hetiang hian thlak ila kan ti a, ‘the Chairperson and every Member’ han tih khan chuan, ‘and’ a nih tawh chuan Chairperson piah lamah khan awm belh an awm tihna a ni ta a. Chuvang chuan Chairperson- ah hian, ‘any Member, if so appointed’ (appoint an lo nih hlauh chuan) tih khan min veng thei dawnin kan hria a.

Pu Speaker, item No.9 atan chuan, Serial No.8 ami, amendment of section 9 kha heti hian kan han ti leh a. Helai, a kar teah khan, ‘if there are any Members’ tih kha zeh ngaiin kan hria a, a nih loh chuan pakhat aia an tam lai khan kan thusawi ngai bawk, single bench ringawt a nih lohna turin pakhat aia an lo tam si khan an hnathawh tur kha a tithuanawp ang tih kan hlau a, kha kha zehluh leh ni se kan ti a ni. Tin, sub-section 2-a ‘available’ tih awm kha ‘if any’ (a awm a nih chuan) tih hian inven loh chuan ‘available’ kan tih ringawt chuan keimahni tul lovin kan inphuar mai mai dawn e kan ti a.

A tawp berah chuan, section 19-ah khan, ‘A bench consisting of at least two members’ tih hi paih tawp ila, khami kan han ‘omit’ chiah khan, a Dan bu kan chhiar khan, ‘the Lokayukta’ tih kha arawn zawmtu chiah a ni a. ‘The Lokayukta’ tih kha sawi leh sawi hnu, a nung chho em em a, kha khan a phuarkhawm kimin kan hria a. Chutiang avang chuan kan Lokayukta-ah hian mihringte pawh kan lo hmu tam theilo maithei a, huam viau mah ila, pathum tal hi chu kan hmu thei ang kan tih laiin, kan duhtak te pawh an lo remchanglo thei a, duh ang taka awm hi a harsa thin a. Tin, kan duh ang zawngte pawh kha an lo vang phian thei a. Chuvangin heng amendment kan han siam, kan han

rawt, ‘Eleven items of amendment’ tih te hi he House-ah hian tuna ka han sawi atang khan, a bupui ti mai ang, a Dan bu nen khan min han chilh se, kan member zahawm tak te sawiho atan khatiang khan ka rawn chhawpchuak a ni. Ka lawm e.

**SPEAKER** : Awle, kan minister zahawm tak khan a putluhna chhan fiah takin a sawi tawh a. Tunah sawihona kan tan tawh ang a, kan tan thei tawh mai e. Sawi duhin sawi rawh u le. Sawiho ngai lovah kan ngai em ni?. Awle, Pu K. Sangthuama.

**Pu K. SANGTHUAMA** : Pu Speaker, han sawi tehchiam lam ai mahin, hemi section 3 kha tun-aia chiang deuh khan min han hrilfiah se ka duh deuh hlek a. A hmaa chairman tur chungchanga amendment neih hma a awm dan leh tun ami hi chiang takin min hrilhfiah thei se ka duh a. A tlangpuiin, hei, a tha viau a, helai chairman chungchang ruat dan leh chairman tuna a nih dan leh chairman kan han ruat tura te an qualification, ti mai ila, khang ang chi, a hma a kan tih ang kha kan paih leh ta deuh nge ni, chiang takin min hrilh sela tih ka’n duh deuh a. A dang chu sawi tul awm pawhin ka hre lo. Pu Speaker, ka lawm e.

**SPEAKER** : Pu Vanlalzawma.

**Pu VANLALZAWMA** : Pu Speaker, kan Minister zahawm tak khan No.10 leh 11-na kha a la move tel lo deuhin ka hria.

**SPEAKER** : Nia, a move tello em ni?

**Pu LALSAWTA, MINISTER** : Pu Speaker, member zahawm takin a rawn sawi lai kha ka lo tikimlo a ni mai awm tak e, Serial No. 10 kha section 56-a 56-na ‘for the protection of complainant under this Act, the Whistleblowers Protection Act, 2011 (No. 17 of 2014) shall apply’ tih kha a hma ami kha tun ami heng ‘words’ te hian a rawn substitute dawn a. Kha kha ka’n sawifiah nghal law law ang a. Pu Speaker, “for the



protection of complainant under this Act section 20 of Anti-Corruption grievance Redressal and Whistleblowers Protection Act, 2011 shall apply” tihah hian a Dan hming hi a inang ta lo deuh hlek a ni. A principal Act-a a Dan hming kha. Chuvangin heta ka rawn sawi ang khan ‘The Whistleblowers Protection Act, 2011 ( No. 17 of 2014) shall apply’ tih zawk kha, tuna ka han chhiarchhuah chiah aiah khan thlak tur a ni. A Dan hming tlemin a inang lova, tichuan serial no. 11-ah khan Amendment of Section 57 Clause (a) sub-section 2 of section 57 shall be omitted a ti a. 57 Clause (a) of sub-section 2 chu ‘the form of complaint refer to in clause (a) of sub-section 1 of section 2’ tih hi khatianga lo tih a nih tak avang khan, tun Amendment avang khan a tul tawh lova, hei hi chu paih tawh tur a ni. Omit tawh tur a ni, tunlai tawng chuan ‘delete’ tawh tur a ni kan tih ang kha a ni ang chu.

Kha ka han tihhmayh phengphung a, House ngaihdam pawh ka dil a ni. Khati khan Section 56 leh 57-a a words thlak hlawk hlawk leh omit tur han siam tawh turah kha kha ka rawn sawi belh a ni Pu Speaker.

**SPEAKER :** I lungawi em? Pu Zawm, aw, sawi tur dang kan awm em? Kan awm tawh loh chuan Minister zahawm takin pass rawn dil tawh mai se.

**Pu K. SANGTHUAMA :** Khawngaih a mangnghilh deuh a niang a Pu Speaker, pass a dil hma khan khawngaih takin kan chian lehzual nan.

**SPEAKER :** Aw, aw, a wind up tur a ni, Pu Sangthuama sawi kha clarification a ngai tak e.

**Pu LALSAWTA, MINISTER :** Pu Speaker, section 3 hei hi Lokayukta-a Chairman te leh member te qualification a rawn tukna a ni a. A Dan hlui hi han chhiar ta phawt ila, a hlui pakhatna atang hian chhiar ta ila, ‘as from the commencement of this Act there shall be established in the state of Mizoram by notification in the official

gazetted, a body to be called the “Lokayukta” who would have administrative, financial and functional independence from the Government’ a ti a. Sub-Section 2-ah ‘the Lokayukta shall consist of’ arawn ti a, ‘a chairperson’ a ti a, Lokayukta Chairperson tur atan khan qualification kha khatiang khan – ‘who is or has been a Chief Justice of the High Court or so and so’ a ti a. Khami zawm chiah khan khami Chairperson atana kan duh leh heta Judicial member atana kan duh kha thuai kawp vek se, heng qualification nei, mahse, Judicial member kha a lo awm loh palh, member pakhat chauh awm tur anga kan lo ruahman a, Judicial member kha awm lo tur ang a nih kha chuan a famkim dawn si lova kan ti a. Chuvangin, hetah hian kan telh ta a ni.

Chairperson chauh pawh kha ni ta sela, ani kha Judicial member ang qualification nei veka kan tih kha chuan kan inhmu zo lo ang tih te pawh kha a hlauhawm ve tho a. Chuvang chuan, hetah hian kan zuk zehna lai tak chu, 2-na (a)-naah khan ‘and’ tiin a tawp ta a. ‘And’ ti a tawpah khan ‘and’ kha ring nghalin ‘oblique’ kha kan thai ta a, ‘or if appointed’ kan ti ta a.

Tichuan, sub-section 3-na min ensak leh ta sela, hetah hian qualification-a kan duh kha, a main Principle Act ami ni lo, kan rawn tlar deuh dal kha, kha kha zep lut ta ila kan ti a ni. Chu chu ‘as a Chairman or as a member’ tih hi khalaiah khan sub section 3 kha in hmu ang a, section 3-na a (a)-naah khan ‘as a Judicial member’ tih ni lovin, amendment tura kan rawn tih bu ami zawk kha zep lut ta ila kan ti a ni.

Pu Speaker, heng zawng zawng kan tih chhan hi Chairperson chauh kan neih hun lai pawh a hnathawk thei turin kan duh dawn a. Chutiang a nih rual chuan Chairperson leh member pakhat emaw, member pahnih dang an neih lai pawhin hnathawk thei tho tur si khan kan duh a ni. Chuvangin an qualification-ah khan hetiang a kan siam rem loh chuan, Judicial member chauh qualification kha a hranpa-a kan han siam ang kha kan hmuh leh bawk si loh chuan kan buai dawnin kan hria a. Chutichuan, tuna amendment hi kan han ti a.

Dan siam hi a tui vak lo tan pheii chuan a buaithlak khawp a. Member zahawm tak Pu K. Sangthuama pheii kha chuan a pawimawhna lai tak leh a fuh loh theihna lai tur kha minrawn ven sak a. Tichuan, Amendment zawk hi kan chhiar lawk ang a, 'As a Chairperson or as a Member other than a Judicial Member, if he is a person of impeccable integrity, outstanding ability having special knowledge and expertise of not less than 20 years in the matters relating to anti-corruption policy, public administration, vigilance, finance including insurance and banking, law and management' tih te,

(b)-naah 'As a Chairperson or as a Judicial Member if such person is qualified to be a High Court Judge or has a vast knowledge of law and experience in judicial matters or courts' tih zawng zawng kha an nei emaw nei lo emaw kha helaiah hian khatiang judicial background nei kher lo pawh kha Chairperson-ah kan hmuh chhun te an nih a, tha kan tih bawh chuan kan appoint theih nan qualification hi hetiang hian i siamrem ang u kan ti a. Khami kha helai a Principle Act-ah khan va bel thlawrh tur a ni. Kan va bel thlawrh kha chuan tuna amendment kan rawn tih chhan ber hi a hlawhtling dawnin kan hria a ni. Ka sawifiah thiam emaw, a harsa em em mai a hei hi chu, a fiah chuan ka hria a, keima ngaihdan atang chuan.

**Pu K. SANGTHUAMA :** Pu Speaker, a fiah thawkhat a, keini ang rual tan chuan ngun taka mithiamin an sawifiah zel loh chuan hriat loh mai hi a awl ve bawh a, Chuvangin dawh thei taka kan zawhna te kha ngaihtuah fo a ngai dawn a, tun hnuah pawh a dik chiah chuan kan Finance Minister hi Dan thiam a ni a, ani tan pawh hrilhfiah a har angreng khawp mai a ti a, keini ang rual tan pheii chuan hriat pawh a har a, a lawmawm khawp mai a. Engpawhnisela, kan hotuten tha taka an han buatsaih kha keinin a awmzia kan hriat ve kha a lo tha si a, Chuvangin ka'n zawh chian kherna chhan a ni e.

**SPEAKER** : Sawi tur dang, zawhna dang a awm tawh loh chuan kan Minister zahawm tak sawm ila pass han dil tawh mai se.

**Pu LALSAWTA, MINISTER** : Pu Speaker, member ten min tuipui a, min zirchian sak em avangin tam tak hi chuan sawi chian tul lovah an dah te pawh a nih ka ring a. Chuvangin khatianga kan ram siam thatna tur ‘Lokayukta Amendment Bill’ kum 2016 atana kan han neihna tura kan han sawifiah tawh hnu hi chuan a hnial zawng an awmlo bawka, pass ka han dil a ni.

**SPEAKER** : A hming hi lam sual a hlauhawm a, engpawhnise, kan Minister lam rik dan hi a dik berah ngai ila a tha a nge. Chuan kan Minister zahawm tak Pu Lalsawta’n “The Mizoram Lokayukta (Amendment) Bill, 2016” chu he House hian pass pui turin a rawn dil a. Pass remti zawngin ‘remti’ ti rawh ule, ‘Remti’. Remti lo kan awm em? kan awmlo. Tikhan “The Mizoram Lokayukta (Amendment) Bill, 2016” chu he House hian lungrual takin a pass ta a ni.

**Pu LALSAWTA, MINISTER** : Pu Speaker, ka lawm e.

**SPEAKER** : Awle, keini ho hi Mizoram State Assembly vawi 7-naa member awm mekte kan ni a, chumi Assembly 7-naa Session vawi 8-na tur chu vawiinah hian kan zo thei dawn ta a ni. A lawmawm hle a ni.

Kan hriat angin BAC February ni 15 a thukhawm khan March ni 15 atanga thut a, ni 31 a tawp turin programe a duang a. Tahchuan ni 12 chhung Session kan nei a ni. Kan Session chhung hian Starred Question 339 a lut a, chumi zingah chuan admit zat chu 304 a ni. List of Business a dah zat chu 182 a ni a, House a chhan zat 79, House a chhan hman loh 103 a awm a ni. Tin, Unstarred Question lut zat hi 34 a ni a, zawhna admit 30 a awm a ni. Zawhna hi chhanna awmlo 5 kan nei a, chung zingah chuan GAD atangin 4 kan nei a, pakhat erawhchu

Health & Family Welfare Department ami a ni a, hei hi Unstarred a ni. Panga chhanna dawn loh kan nei a. Nakin zelah chuan Department te khanin zawhna lut hi chu chhan hram tum ila a tha ang e. Tin, tam tak chu chhanna kan hmu a, department tam tak zawhna tluang taka chhangtute hnenah lawmthu kan sawi a ni.

Ni 15 tun thla khan kan Governor zahawm takin kan Session tan niah khan thusawina a nei a, heta a thusawi Motion of Thanks chu Pu R.Vanlalvena'n a rawn putlut a, he House hian ni 16 khan sawiho a nih hnuin lungrual taka pass a ni ta a ni.

Tin, obituary mi pahnih, kan hruaitu Mufti Mohammad Syed, Chief Minister of Jammu & Kashmir leh Pu P.A.Sangma, Member of Parliament leh Lok Sabha Speaker lo ni tawh te sunna kan nei a. He sunnaah hian kan House Leader zahawm tak Pu Lal Thanhawla leh Pu Vanlalzawma, Opposition Group Leader ten thu an sawi a ni. Anmahni hriatrengna/sunnan minute 1, member zawng zawng dingin ngawi rengin kan awm a ni.

Tin, Panel of Chairmen – Pu John Siamkunga, Pu Ngurdingliana, Dr. K. Beichhua, Pu Chalrosanga Ralte te tun Session chhung hian ruat an ni.

Tin, Pu R.Romawia'n Land, Revenue & Settlement Minister a nihna angin Referral Hospital, Falkawn a ram sahhek a, Revenue Department a mi 2 hnena LSC pek ang a puhna chu a sawifiah a.

Tin, Presentation of Budget kan Finance Minister zahawm tak Pu Lalsawta'n kum 2016-2017 a pawisa hman tur he House-ah hian a pharh a ni.

Tin, Presentation of Reports - Tun Session chhung hian House-ah Report 19 present a ni.

Laying of Papers – Tun Session chhung hian House table-ah Paper 14 lay a ni.

Bill - Tun Session chhung hian Government Bill 5 kan pass hman a ni. Bill 5 kan pass a, kan pass tawh kha chuan Act a lo ni tawh ang.

Resolution - Session chhung hian Private Members' Resolution 56 kan dawng a ni. Admit a pawm vek an ni a, heng zingah hian a hnuai Pu K.S.Thanga Resolution hi House a sawiho a nih hnuin lungrual taka pass a ni. “Medical College nei tura hmalak mek hi lawmawm kan ti” tih a ni kan Resolution chu.

Tin, Demand hrang hrang, Minister hrang hrang ten an department enkawl na tur an Demand te chu member ten thahnemngai taka sawiho a nih hnuin House-in lungrual takin a pass ta a ni.

Sawi tawh angin tun Session chhung hi ni 12 a ni a. Bill kha tihsual palh, 4 kan pass a, 1 kha Select Committee-ah refer a ni a, kha kha kan lo chhiar tel palh a ni e.

Kan sawi nin theih loh chu he House a member zahawm tak te chet hmang, thusawi dan te, awmdan te hi a ni. Khawvelin entawn sela kan duh khawp mai a. Hei hi kristian kan nihna tihlanna tha tak a niin ka hria a. Chumi piah lamah keima mimal taka min tilawm em em chu, kan thawmhnaw inbel hi a ni. Inbel duhdah tak kan awm lo. Hei saptawngin sawi khang lang ila, neat & tidy, decent, felfai tak, tha tak. Kan inchei em em loh pawhin felfai tak, hmuhnawm tak vekin nitin member zahawm takte hi kan inchei a. Hei hian engemaw chen chu keima rilruah hian kan rilru a pholang niin ka hria a, ka lawm em em a ni.

Vawiinah hian Assembly Secretariat a kan staff-te thawhrimna te, an thawkrim em em a, an hnenah lawmthu ka sawi a.

**SPEAKER** : Tin, department tam taka kan officer-te an thawhrim bakah tam tak chu zan rei tak tak thlengin kan rualin an thu ve a, a ropui kan ti a, kan lawm em em a ni.

Tichuan, tun Session chu Pathian hruainain tuang takin kan zo thei ta a, a ropui ka ti a, a lawmawm ka ti takzet a. Pathian hnenah kan vai hian lawm nachang hria ila a tha ang e. Chuan, kan bang rih ang a. The House is adjourned. Sine Die. (2:55 PM)